

Hutarieka mieme xapayari Tsamuheri

Tsahuri kemitiumi niukiyari

(2Tsam 1:4-12 - 1Tsam 31:1-13, 1Kem 10:1-12)

¹ Merikitsi Tsahuri hemieriekuri, Rawiri Tsikiraki mirakutewatsie huta tukari kaniuyurieni meta 'amarekitsixi wara'iwakari.

² Hairieka tukaritsie xewiti tewi heyuta'unaka Tsikiraki kaninuani, Tsahuri kuyaximama mematitekai heyeyaka. Kamixaya peukatsanikai meta mu'unaximati kemitiyuhieriekai miki pi'iniariyaritikai, mana Rawiri hixie nuaka kaniukatunumakeni kwiepa.

³ Rawiri mipai katinita'iwawiya:

—¿Hakewapai pepeyetia?

Kuya mipai katinita'eiya:

—Nepeyuta'unaxi 'ixaheritsixi memakuteitsie.

⁴ Rawiri mipai katinita'iwawiya:

—Kenetineutaxatia naime kemireyi.

Miki tewi mipai katinita'eiya:

—Matsi 'ipai pireyi takuyaxima mepeyuta'unaxia mirayukwitinetsie meta yuwaikawati mekanekwi'iwa. Miki Tsahuri meta nu'aya Kunatani mepekwi'iwaxi.

⁵ Hiki Rawiri niuki mi'atiri mipai katiniuta'iwawiya:

—¿Kehapaitiri 'eki yapepitimate kename Tsahuri meta nu'aya Kunatani mehekwi?

⁶ Mipai katinita'eiya niuki mi'atiri:

—Ne 'atsinekatimaiti Kiriwuha yemuriyaritsie nekaneyeikakaitini. Ne nekaneixeiya kepauka Tsahuri yupitsikatsie meyukaxui, hiki kuyaxi kaxetatetsie me'uteti memeye'unie mekanehuraweiyakaitini meta kawayutsixi wahetsie me'uteti.

⁷ Tsahuri kananakuniere kanenexeiya. Hiki kanenetahiawe, keminereta'aitia yanekatinekayani.

⁸ Hiki kaneneta'iwawiya, kemi'ane nemihikitikai, ne mipai nekatineita'eiya: “Amareki tewiyari nepihiki”.

⁹ Hiki kanenetawawirieni 'ahurawa nemuyaniki, mipai kanetinetaitiani: “Ximixi keneneumi'a, nepitiuka'eniwa xeikia nepikamiwe”.

¹⁰ Ne 'ahurawa ne'uyaka nekaneimieni, mipai neretimaika mikatawikwenikeaikiri. Hiki kuruna menakekai nekanenutihanirieni meta matsiwaya miraye'axe, para 'eki pita neti'aitiwame nemimatsiyetuirieniki.

¹¹ Hiki Rawiri meta hamatiana memiti'ukai me'u'enanaka, yukamixa mekaneukatsanaxiani hiwerikaki.

¹² Meyuhiwerieti meta meyhakieti mekaniukutaiyaiyarieni, Tsahuri meta nu'aya Kunatani 'ixiparaki memekwi'iwakaiki, yaxeiata Yawé kuyaximama waheki meta 'Ixaheri nuiwariyari wahetsiemieme.

¹³ Merikitsi Rawiri temaiki kaniuta'iwawiya niuki mi'atiri:

—¿Hakewa pepekiekame?

Mipai katinita'eiya:

—Teewatanaka nekanihikitini 'amareki tewi-yari.

¹⁴ Rawiri mipai katinitatieni:

—¿Kari 'eki miya pepireyuri Yawé menayexei pepemi?

¹⁵ Hiki tewi xeime yuhetsia mieme 'uta'inieka mipai katinita'aitiani:

—Kenanuhanaka kenemi'a.

Kemitiuta'aitiariakai 'iya kaneye'atiani kanimieni.

¹⁶ Rawiri mipai kaniutayini:

—'Akimana 'ahetsie pekatinahiani pekani-uyumieni peyutahekiataka Yawé menayexei pememiki.

Rawiri kemitiyuiweriekai Tsahuri meta Kunatani waheki

¹⁷ Merikitsi Rawiri 'iki hiwerika kwikariyari kaniutakwika Tsahuri meta nu'aya Kunatani wahapaitsita mieme.

¹⁸ «Tuupi kwikariyari» katiniteriwa. Meta katiniuta'aita miki kwikari Kura kiekatari memita'ikitiarieniki. Mipai katine'uka Katsexi xapayatsie:

¹⁹ «Xia'ui 'Ixaheri. Wakimana pemi'ata'irekai mekwikwi'iti yemuritsie mekanekuheni. Yuwaikawati kuyaxi memitirikawi hiki mekanekwi'iwa.

²⁰ »Kahati kiekariyaritsie xepikaheikuxatani meta 'Atsikaruni kayeyari 'utia mipai xepikatehehiwani, 'ukari piritsiteutsixi memikaheyutemamawiekaki

'ixiarari memikahewewiekaki miki xitekiya
'iniariyari memikahexeiya waniwema.

21 »Xia'ui, Kiriwuha hiriyarite,
xeme xehetsia pika'ukawiwiyeni meta
pika'ukuhaitsiyatani.
Tiriku pika'utixuxuawereni mawari
mayaniki.

Tsahuri mana mukahiiki kimana muyuku-
narima 'a'iti:
memite'ayu'iwa kimana memiyukunarima
mana mepeihia.

22 Kunatani 'iriya
yapitixuxurekai,
yaxeikia Tsahuri 'ixiparaya yapitixurekai
memiwaraye'unie waxuriyaki.

23 »Tsahuri Kunatani matia. 'Aixia
mepite'u'iyarikai.
Miki 'aixia mepitenaki'eriwakai,
'axeikia yunaiti mekaniukwini.
Miki kwinimieme mekatennautsawawekaitini
keyuri kwixi,
meta waikawa mekanitirikawikaitini keyuri
mayetsi.

24 »Xia'ui, 'ukarawetsixi 'Ixaheri kwieyaritsie
kiekatari. Xekeneutitsuanani Tsahuri
hetsiemieme,
mixekemaritiakai 'ixuriki witsimi'aneki
kwimixetaki,
meta witsimixekuyuruwakai huru kukate-
yariki.

- 25 »Xia'ui kuyaxi memitirikawi hiki
mekanekwi'iwa
Kunatani yemuri 'amanutitewatsie kanekani
mikiiti.
- 26 Kunatani, 'ahetsiemieme waikawa
nepineheiwérie,
ne'iwa hepai nepimatinaki'eriekai.
Matsi waikawameki nepimatsinaki'erikai
keyuri 'ukarawetsixi ketemitewanaki'erie.
- 27 »Yuwaikawati kuyaxi memitirikawi hiki
mekanekwi'iwa
Yu'ixipara me'utinawaiyarieka mana
mekanekuheni mekwikwi'iti».

2

Rawiri Kura kwieyaritsie ti'aitati kemititsutia

¹ Merikitsi yapaimexia tukari 'anukayaku,
Rawiri Yawé mipai katiniuta'iwawiya:

—¿Netiyiwe hipame kiekaritetsie nemimieki
Kura kwieyaritsie?

Yawé mipai katinita'eiya:

—Huu, pekaniyiweni pemimieki.

Tawarita Rawiri mipai katinita'iwawiya:

—¿Kepehaine kemi'ane kiekariyaritsie nepimie?

Yawé mipai katinita'eiya:

—Hewuruni kiekariyaritsie.

² Hiki Rawiri mana kaneyani yu'itama
yuhutame warawititi, 'Akinuhani Ketsireri
kiekame meta 'Awikahiri, Nawari 'iyayatikai
Kaximeri kiekame.

³ Meta yukuyaxima kaniwarewitini, miki
yuxexiiti yutiriyama mewaruwitikime, yunaiti

mana mekaniyuhayewa Hewuruni 'aurie kiekarite 'etsimiyeysie.

4 Merikite Kura kwieyaritsie kiekatari Hewuruni kiekariyaritsie mekanekine, mana Rawiri mu'uyatsie hatseiti mekanikawirieni, mipai mekatenenukakeni ti'aitame mayaniki Kura nuiwariyari hetsiemieme. Meta mekatenitaxatiani kename Kawetsi Karaha kwieyaritsie memitama Tsahuri me'ukateukixi.

5 Hiki Rawiri Kawetsi kiekatari niuki kaniwareni'airieni mipai tiwarahiaweti: «Yawé 'aixia kexeyurieka tixe'aitiwame Tsahuri hetsie xemitewiyakaiki meta xemeikateukixiki.

6 Hikita, Yawé kexenaki'erieka meta 'aixia ketiuka'iyarini xehetsiemieme, neta 'imikieri nepitixeyetuirienikeyu miki hepaitsita ke'aixia xemite'uyuriki.

7 'Ayumieme xekeneyuwairiyani meta xepikamamaka, tsepaneti Tsahuri tixe'aitiwame mumi, Kura nuiwarimama nemu'utsie hatseiti mekaneniukawirieni tiwa'aitiwame nemihikitiniki».

'Ixaheritsixi Kura nuiwarimama ke-memitewarutakwi

8 Merikitsi 'Awinexi Nexi nu'aya Tsahuri kuyaximama tiwa'aitiwame, 'Itsiwutseti Tsahuri nu'aya kanewitini Makanahini kiekariyaritsie,

9 mana kanenukakeni ti'aitame mayaniki Karaha kiekariyari hetsie, meta Ketsuri, meta Ketsireri, 'Epirahini hetsiemieme, Wenikamini meta naitsarie 'Ixaheri kwieyari hetsie.

10 'Itsiwutseti Tsahuri nu'aya huta tewiyari wiyari pexeyakai kepauka 'Ixaheri

kwieyaritsie ti'aitame mayeitiarie, huta wiyari katini'aitakaitini. Matsi Kura nuiwarimama xeikia Rawiri ti'aitame mekanayeitiwakaitini,

¹¹ miki Hewuruni 'ukaiti katiniuta'aita Kura nuiwarimama wahetsie 'atahuta wiyari heimana 'ataxewi metseri kaniuyurieni.

¹² 'Awinexi Nexi nu'aya Makanahini kiekariyaritsie kanayeyani 'Itsiwutseti Tsahuri nu'aya kuyaximama warawititi, Kawahuni kiekariyaritsie kaninuani.

¹³ Tsariwiya Rawiri kurieya Kuhawi pimamayatikai, miki Kuhawi Rawiri kuyaximama wahixie 'anuyekaiti kanayeyani. Miki kuyaxi mekananuyukunake haa muyema Kawahuni kiekariyaritsie mieme mana 'aixia mekatenu'uni meyutakwinike.

¹⁴ Hiki 'Awinexi Kuhawi mipai katiniutahiawe:

—Ne mipai nekanaineni yayupaimeti temari mekeyutakwini kemi'ane memite'ayu'iwa.

Kuhawi mipai katinita'eiya:

—'Aixia kaniyimiki.

¹⁵ Hiki mana mekaniukine tamamata heimana yuhutati temari wenikamini nuiwarimama 'Itsiwutseti Tsahuri nu'aya hetsia miemete, meta tamamata heimana yuhutati Rawiri kuyaximama.

¹⁶ Yuxexuiti kuyaxi memiwaraye'unie yumu'utsie mekanikawirixiani hiki wa'etsata mekaniwareutsexiani, hiki mipai mekatenuyukwini yupareku, 'ayumieme mana mipai tiuyiku,

Kawahuni kiekariyari 'aurie, Kerikati Hatsurini katiniuteriwariwani.*

¹⁷ Miki tukaritsie waikawameki mekaniuyutakwini yemeki, Rawiri kuyaximama 'Awinexi mekana'iwa meta 'ixaheritsixi kuyaxiyari mekaniwara'iwa.

¹⁸ Mana mekaniu'uwakaitini Tsariwiya niwemama: Kuhawi, 'Awitsahi meta 'Atsahe. 'Atsahe kwinimieme piranautsawekai, maxa kemiranautsawe hepai 'amakuyewatsie,

¹⁹ hiki 'Awinexi kananukuweiya ka'ihayewati.

²⁰ Yu'utima hanakuniereka, 'Awinexi mipai kaniutayini:

—Ė'Ekitsi 'Atsahe pekatiyiane?

Miki mipai katinita'eiya:

—Huu ne nepiyiane.

²¹ Hiki 'Awinexi mipai katinitahiawe:

—Neuxei keneneuhayewa. Matsi 'aixia piyini xeime pita pemiwiya, tepiateya 'ahetsiemieme mirayaniki.

Peru 'Atsahe pika'enu'eni,

²² hiki 'Awinexi tawarita mipai katinitahiawe:

—'Ari penetsi'uweiyati ketineuhayewa, nikati nematsi'umieni. ĖKehapaita 'a'iwa Kuhawi nerahiaweni?

²³ 'Atsahe matsi ka'ihayewakaku 'iweiyati, 'Awinexi yupitsika 'ikayariki kanenakutseni, yuriepana kanitatseni. Pitsika warieyatsiepai kananeni, mana 'Atsahe kaniukaweni.

* **2:16 2:16** *Kerikati Hatsurini. Hepirayuki 'ixiparaki mirayukwitixi panuyine.*

Mana yunaiti memuyekikakai 'Atsahe-
ri kaxarieya manukatei mekaniwa'uwekaitini
me'ixeyakuti,

²⁴ peru Kuhawi 'Awitsahi matia 'Awinexi
mekananukuweiya. Tau kanakayu-
nirimekaitiniri kepauka 'Ahama yemiriyaritsie
memiye'axia, Kihaki 'aurie Kawahuni
makumawe huyeyari manuyehane.

²⁵ Mana kuyaxi Wenikamini nuiwarimama
mekaniyukuxerieni 'Awinexi meparewienike,
mekanayekine memiwatakwiniki hiri
'amanutitewatsie.

²⁶ Hiki 'Awinexi Kuhawi mipai katiniutahi-
wieni: —'Ari tepitehayewa tetakwitiweti. 'Akuyaxima
mipai ketiniwarutahiawi memitatsihayewaki.
Tami mipai pekatimate tsepa xemite'ayu'iwaxi,
hiwerikata xehexeyati xemakine.

²⁷ Kuhawi mipai katinita'eiya:
—Yuriki Kakaiyari hixie mipai nekanaineni
xika 'atsipeka'utayinike, matsi nekuyaxima
mepikatariyarienikekai 'eki meta 'akuyaxima
texe'uweiyati.

²⁸ Hiki 'ana Kuhawi 'awa kaniutahitsieni,
yunaiti kuyaxi 'ixaheritsixi mewaruweiyati
mekateniuhayewa, manari mekaniyuhayewa
matsi tawariri mepikawaranukuwei.

²⁹ Hiki miki tikariyaritsie 'Awinexi meta
kuyaximama 'Arawa kwieyaritsie mekani-
uyekine. Manata Kurutani hatuxameyaritsie
me'anukineka, Wituruni kwieyaritsie mekani-
uyekine, Makanahini paiti mekaniye'axiani.

³⁰ Kepaukari Kuhawi 'Awinexi 'uweiyati
mitiuhayewaxi, nuaka yukuyaxima yunaime

kaniwaruti'iniata. Tamamata heimana 'atanauka Rawiri kuyaximama meheuyeweti mekanakine meta 'Atsaheri.

³¹ Matsi Rawiri kuyaximama haika tsienituyari heimana haika tewiyari mepiwarukwi 'Awinexi kuyaximama Wenikamini nuiwarimama.

³² Hiki 'arike 'Atsaheri kaxarieya mekanekweni Wereni paiti mekanekateuku, paapaya makateukietsie. Miki tikariyaritsie Kuhawi meta teiterimama mekanekine, hiki Hewuruni paiti ximeri mekaneta'axiani.

3

¹ Tsahuri nuiwarimama miixa wiyari mepuyuri Rawiri nuiwarimama mewakwitiweti. Rawiri matsi waikawa tirikariya hexeyati kanayeiximekaitini ti'aitati, peru Tsahuri hetsia mieme matsi kanitaweranaxiiximekaitini.

Rawiri niwemama Hewuruni memutinunui-waxi

(2Tsam 3:2-5 - 1Kem 3:1-4)

² Merikitsi Rawiri mexi Hewuruni kiekariyaritsie 'ukatei, tiiri kaniwarayexeiya:

Mexiakame 'Aminuni pihikitikai 'Akinuhani Ketsireri kiekame nu'aya,

³ hutarieka mieme Kirehawi 'Awikahiri nu'aya, Nawari Kaximeri kiekame mi'iyayatikai,

hairieka mieme, 'Awitsaruni Mahaka nu'aya, ti'aitame Tarimahi nu'aya Ketsuxi kiekame,

⁴ naurieka mieme, 'Aruniyaxi Kakiti nu'aya, 'auxiwiriekame mieme, Tsepatiyaxi 'Awitari nu'aya,

5 'ataxewiriekā mieme, 'Itirehani 'Ekira
nu'aya, xewitita Rawiri 'iyaya.

'Iki Rawiri niwemama mekanihikitini
miwarayexei Hewuruni kiekariyaritsie
kepauka mukatei.

'Awinexi Rawiri matia tiratu kememite'uwewi

6 Merikitsi kepauka Tsahuri nuiwarimama
memiyukwitiwekai Rawiri nuiwarimama
wahamatia, 'Awinexi waikawa tirikariya
hexeyati kanayeiximekaitini Tsahuri
tiriyamama wahetsie,

7 Tsahuri xeime pexeyakai yutuxeri Xitsipa
titewakame 'Ayaha niweya, miki hamatia 'Aw-
inexi kaniukahuni. 'Ayumieme 'Itsiwutseti mipai
katinitatieni:

—¿Titayari nepaapa tuxerieya hamatia
petiukahui?

8 Hiki 'Awinexi waikawameki 'uyeha'aka miya
mititahiawixiki, mipai katinita'eiya:

—¿Ne tsiki netihiki Kura kiekame?
Ne heitseriemeki Tsahuri tiriyamama
nepitiwa'uximayatsiriekai, yaxeikiata 'iwamama,
hamikumama, meta nepikamatsiyetuawe Rawiri
hetsia. ¿Titayari hiki penerate'a kename 'ukaratsi
hamatia ne'ukahui?

9 Ne, Yawé 'axakenetsi'uyurieni kanetsinen-
imayati, xika Rawiri hetsia yanekatiuyurieni
xika neka'iparewieni yamiraye'aniki Yawé mipai
kemititahiawixi:

10 Tsahuri niwemama 'uweni
nepiwanawairieni, Rawiri pita nekaniye-
tuiriemiki 'Ixaheri kwieyaritsie mitita'aitaki meta

Kura kwieyaritsie, Rani kwieyaritsie katsutime Weritsewa paiti ye'atikaime.

¹¹ 'Itsiwutseti pikayuwairi 'Awinexi mita'eiyaki xeiniukiyaritima kanimakaxekaitini.

¹² Hiki 'Awinexi 'iki niuki kaneni'ani Rawiri hetsia: «'Iki kwie xewiti pikarapiini, matsi 'eki pi'ahetsiemieme. Tiratu nehamatia keneuwewi, hiki 'ana ne nekamaniparewimiki yunaiti 'ixaheritsixi 'ahetsie memitewiyaki».

¹³ Hiki Rawiri mipai katinita'eiya: «'Aixia kani'aneni. Ne tiratu nepiwewieni 'ahamatia, perutsi xika penetsi'atirieni Mikari Tsahuri niweya. Mexika pekanetsi'atirieni, kanikatixaitini».

¹⁴ Metatsiere, Rawiri hipame yuhetsia miemete kaniwareni'ani 'Itsiwutseti Tsahuri nu'aya hetsia, mipai memiteheitaxatiani: «Ne'iya Mikari keneneyetui, xeitsienituyari pirsitsiteutsixi newarukwika neme'iwaxi».

¹⁵ Mikahari kanewitikikaitini Paritiheri Rahitsi nu'aya, hiki 'Itsiwutseti katiniuta'aita minawaiyarieniki,

¹⁶ peru Paritiheri 'utimana kaneyani 'utsuaximeti Wakurini mirayetewatsie paiti kaniye'ani. Mana 'Awinexi kanitani'ani mukunuaniki, hiki Paritiheri kanenu'enieni.

¹⁷ Hiki 'Awinexi 'ukirawetsixi 'Ixaheri kwieyaritsie kiekatari wahamatia katiniutaxata, mipai katiniwarutahiawe: «Mixa panuyemie xeme Rawiri ti'aitame xemiyeitiaku.

¹⁸ Peuyewetse 'ari mipai xemiteyurieni, kariki Yawé mipai kaniutayini: «Ne Rawiri nepanayexei neteiterima 'ixaheritsixi muwatawikweitsitiani

piritsiteutsixi wahepaitsita meta hipame
memiwaraye'unie wahetsia»».

19 Metatsiere 'Awinexi wenikaminitsixi
wahamatia katiniutaxata, hiki 'arike Hewuruni
kaneyani Rawiri retaxatianike yunaiti
'ixaheritsixi meta Wenikamini nuiwarimama
kememiteyurikukai hepaitsitana.

20 Kepauka 'Awinexi Hewuruni munua,
Rawiri 'ikwai 'ixiarariyari kaniuwewieni
hetsiena mieme meta memeweiyakai xeitewiyari
memuyupaimikai wahetsiemieme.

21 Hiki mana 'Awinexi Rawiri mipai
katiniutahiawe: «Ti'aitame, keneneupitia yunaime
'ixaheritsixi nemiwata'inieniki 'ahamatia
tiratu memiwewieniki, mipai 'ana 'ayeumetsie
pepiti'aitani kemimatinake». Hiki Rawiri
'Awinexi kaniutateutiani, mikita 'aixia 'iyari
kaneyani.

'Awinexi kemitiumierie

22 Merikitsi Rawiri kuyaximama meka-
niu'axiani Kuhawi warawititi hipame
mewarekukwika waikawa mete'atiti
memiwara'iwaxi wapiinite. 'Awinexi Hewuruni
pika'uyeikakairi Rawiri hetsia, Rawiri
kaneini'akaitiniri, mikita kaneyakaitini 'aixia
'iyari.

23 Kepauka Kuhawi munua yunaime kuyaxi
warawititi, mipai katiniutaxatiarieni kename 'Aw-
inexi Nexi nu'aya ti'aitame heku'iwataakai meta
kename ti'aitame heini'akai 'aixia 'iyari.

24 Hiki 'ayumieme Kuhawi ti'aitame hetsia
kaniye'ani mipai katinitahiawe: «Kaukatsi

'Awinexi metsiheku'iwataxi. ¿Ketitayari kuta petipitia miyemieki?

²⁵ Ti'aitame 'eki 'Awinexi pekanimaika. Miki kanekuyeixiani meti'itaiyati tikumaineti kepemitiku'eriwa meta naime timaimiti 'eki kepemitiyuriene hepaitsita».

²⁶ Kepauka Kuhawi Rawiri hamatia tiutixataka muwayetia hipame teiteri kaniwareni'ani 'Awinexi 'utia, miki Tsira putsuya matiniere menikunuitiani. Peru Kuhawi 'iki hepaitsita Rawiri pikaraxaxatiwakai.

²⁷ Kepauka 'Awinexi Hewuruni munua, Kuhawi xaitsie kaneiwitini kiekari kitenie, 'awie mireitaxatiani hepai yuxaitame. Muwa hukayatsie kaneitatseni hiki 'Awinexi kaniumini. Mipai Kuhawi katinekapitiani mutaya 'Atsahehi mumiekaiki.

²⁸ Kepauka Rawiri miretima, 'iki hepaitsita mipai kaniutayini: «Ne mipai nekanaineni Yawé hixie, ne meta hakewa nemire'aita 'atsitepikateyuruwamete 'Awinexi Nexi nu'aya kemitiumierie hepaitsita.

²⁹ Kemi'ane memimi mekanihikitini Kuhawi meta tiiriyamama. Hatsuaku tima Kuhawi tiiriyamama wahetsia mepikaheuyeweka meheukuhatikaiti, nawi kwiniyayari mehexeiayati, yatini mehurietikaiti, yatini metakwikwiwati, meta meyehaakakwitiweti».

³⁰ Kuhawi 'Awitsahi matia 'Awinexi mekaniumieni wa'iwa 'Atsahehi mumiekaiki Kawahuni kiekariyari 'aurie memayutakwitsie.

³¹ Hiki Rawiri Kuhawi mipai katiniutahiawe meta yunaime hamatiana memu'uwakai:

«Yukamixa xekeneukatsanaxia, hiwerika
kamixayari xekenanakatixia, 'Awinexi
hetsiemieme xekeneutitsuanani». Mekweiyatsie
ti'aitame Rawiri 'utimana kaniumiekaitini,

³² Hewuruni kiekariyaritsie 'Awinexi kaniuka-
teukieni. Teukiyapa 'aurie ti'aitame karima ka-
niutatsuakakaitini meta teiteri yunaiti hamatiana
mekaniutitsuanakaitini.

³³ Hikí ti'aitame 'ikí hiwerika kwikariyari kani-
utawewieni 'Awinexi hetsiemieme:

«¿Titayari 'Awinexi miyatiumi
mika'uka'iyarini hepai?

³⁴ 'Amamatetsie pepikahiakai
meta 'a'ikatetsie tepiakí pepikahiakai.

Teyumemiwamete memimatsi'umieni
hepai, mipai pekatiniumini».

Teiteri matsi waikawa mekaniutitsuanakaitini.

³⁵ Rawiri hetsia yunaiti teiteri 'ahura meka-
niukine me'i'inietí 'etsiwa mitikwanikí mexi tau
ka'akayuniwekai, peru mikí mipai kaniutayini:
«Kakaiyari kenetiukwinitiani kanetsinenimayati
xika paa neha'iniata yatixaiti 'ikwai 'akuxi tau
ka'anukayuniwekaku».

³⁶ Yunaiti teiteri mikí mekaneitimaitikine,
meta kaniwarunakire. Naime kemitiyurienekai
ti'aitame teiteri kaniwanakekaitini.

³⁷ Mikí tukaritsie teiteri yunaiti meta 'ixaher-
itsixi mipai mekatenetimani kename ti'aitame
katiuyuri 'Awinexi Nexi nu'aya kemitiumierie.

³⁸ Hikí ti'aitame yuteiterima mipai katiniwaru-
tahiawe: «¿Mipai xekatemate hikí tewi mariweti
mumi 'Ixaheri kwieyaritsie?

³⁹ Hiki ne, tsepaneti ti'aitameki nemanayexeyarie, 'akuxi ne nekaniweranini, Tsariwiya niwemama yiki nemiwaruyurieni nepikayiwe. Yawé 'axakerekapitiani miki kemi'ane 'axamitiuyuri».

4

'Itsiwutseti kemitiumierie

¹ Merikitsi kepauka 'Itsiwutseti Tsahuri nu'aya mipai miretima kename 'Awinexi Hewuruni paiti hemieriekai, 'ana kaniutimani meta 'ixaheritsixi yunaiti.

² 'Itsiwutseti teiteri yuhutame kaniwarexeiyakaitini, kuyaxi tewa'aitiwamete mekanihikitikaitini. Xewiti Wanahakatinitewakaitini, xewitita Xekawi, miki meyuhutati Ximuni niwemama mepihikitikai Weruti kiekame, miki Wenikamini mepinuiwarimamatikai. Weruti Wenikamini kwieyaritsie pirawiyakai.

³ Weruti kiekatari meripaiti Kitahini mepuyuta'unaxi, hiki 'akuxi mana mekanetiteni.

⁴ Kunatani Tsahuri nu'aya xeime yuniwe kanexeiyakaitini 'auxiwime wiyari hexeiyakame Mepiwutseti titewakame muti'itsaiwakai. Kepauka Ketsireri tewi heyeyaka mitiwarutaxatia kename Tsahuri meta Kunatani mehekwi'iwakai, mi'iwiyakai kaniyuta'unakaitini 'etuti, peru yumexiitirikaki kanixuawa, 'ayumieme hurieti kanayani.

⁵ Hiki Xekawi meta Wanaha Ximuni Weruti kiekame niwemama, 'Itsiwutseti kie mekanekine, hiki tuka 'amitiixikatsie mekanu'axiani, miki kepauka mutikukutsutsie.

⁶ 'Ukaratsi kitenie tihweme kaneukuni tiriku henati, hiki mana mipai mekatenanutakine Xekawi Wanaha matia 'awie kiita paiti.

⁷ Kepauka 'upaiti memeutahaxia 'Itsiwutseti kanikutsukaitini yu'utatsie. Muwa mekaneititseixiani mekanimieni, hiki mu'uya mehanutixiteka mekaneituni. Miki tikaritsie 'Arawa maku-mawetsie mekaniuyekine,

⁸ hiki Hewuruni meye'axiaka Rawiri 'Itsiwutseti mu'uya mekaniyetuirieni mipai me'utiyuati:

—Neuxei 'eki ti'aitame: 'Ena 'Itsiwutseti mu'uya tekamaniye'atiirieka, Tsahuri mimatsi'aye'uniekai nu'aya muyutatexi matsi miemiti. Yawé hiki katinikihwirieni 'eki ti'aitame 'ahetsiemieme, Tsahuri meta nuiwarimama kememimatsiyurikukai hepaitsita.

⁹ Hiki Rawiri mipai katiniwaruta'eiya Xekawi meta Wanaha Ximuni niwemama Weruti kiekame:

—Yuriki Yawé hixie mipai nekanaineni, 'aixia minetsi'uyuri ne'uximatiarikatsie,

¹⁰ meripaiti xewiti pinetiutaxatia kename Tsahuri hemikai, 'aixia ti'aneme netiutaxatiame puyu'eriekai, peru ne tixaiti nepikatipitia, matsi nekanita'aita mihiiyaniki meta mimierieniki mana Tsikiraki kiekariyaritsie.

¹¹ Matsi yemeki kareuyewetse xeme nemixekwini teyukwikate 'atsikatiyurieneme xemumiki mexi kutsukai yu'utatsie. 'Ayumieme xekatenayukatuakuni xemimiki. Nekanixeku-maweriyamiki 'ena kwiepa.

¹² Hiki Rawiri yukuyaxima katiniwaruta'aitiani memiwakwiniki meta wamamate wa'ikate

memanuxitexianiki, hiki Hewuruni kiekariyaritsie haa mayemarike 'aurie wakaxari mekaniuyewitiani. Matsi 'Itsiwutseti mu'uya Hewuruni mekanikateuku 'Awinexi makateukietsie.

5

Rawiri 'Ixaheri kwieyaritsie ti'aitati kemititsutia

(2Tsam 5:1-3 - 1Kem 11:1-3)

¹ Merikitsi yunaiti 'ixaheritsixi Hewuruni kiekariyaritsie mekanekine Rawiri hetsia meteheitaxatiani. Mipai mekatenitahiawe: «'Eki ti'aitame meta tame 'iwamarixi tekanihikitini.

² Meripaitiri kepauka Tsahuri mitati'aitiwametikaitsie, 'eki 'ixaheritsixi pepiwakuwitineka temiyukwitwekaitsie. 'Eki Yawé mipai kamatiniutahiawe: “'Eki neteiterima 'ixaheritsixi pekanawayewitimiki meta pekatiniwata'aitiamiki”».

³ Mipai katiniuyini, 'ixaheritsixi 'ukirawetsixi Hewuruni kiekariyaritsie mekaniuyukuxerieni ti'aitame Rawiri hamatia memitetixataki, mana wahamatia Rawiri tiratu kaniuwewieni Yawé hixie. Hiki 'ana hatseiti Rawiri mekaniukawirieni mu'uyatsie 'Ixaheri kwieyaritsie ti'aitame mayaniki.

⁴ Rawiri ti'aitati kepauka mitsutia xetewiyari heimana tamamata wiyari pexeyakai, huta tewiyari wiyari katiniuta'aita.

⁵ 'Atahuta wiyari heimana 'ataxewime metseri katiniuta'aita Kura kwieyaritsie Hewuruni kiekariyaritsie, 'arike Kerutsareme 'ukaiti naime

'Ixaheri kwieyaritsie meta Kura kwieyaritsie katiniuta'aita xeitewiyari heimana tamamata heimana haika wiyari.

*Rawiri Kerutsareme kemira'iwaxi
(2Tsam 5:6-16 - 1Kem 11:4-9, 3:5-9, 14:1-7)*

⁶ Merikitsi ti'aitame Rawiri yukuyaxima warawititi Kerutsareme mekanekine, kewutseutsixi mana memititekai mewaretakwinike. Kewutseutsixi Rawiri mana kiekaritsie kahatahaweme me'erietí, Rawiri mipai mekatenuatahawe: «'Ena pepikahatahani, memikaheuneniere meta memika'ikiniwawetiti, mepiteyurieni memimatsitaweia».

⁷ Peru Rawiri piyiwekaxia kiekari Tsiyuni kuraruya 'amatitewatsie meutahani, hiki 'ayumieme Rawiri kiekariena katinitewaka.

⁸ Rawiri miki tukaritsie mipai kaniutayini: «Kemi'ane miyuwairiya kewutseutsixi miwakwimieki, tetiata haa memuwayekwewietsie keheukahani, memika'ikiniwawe meta memikaheuneniere miwarekwiniki. Ne miki nekaniwaxani'erieka». Mana niuki mipai maniyine kanayeneni: «Memikaheuneniere meta memika'ikiniwawe ti'aitame paratsiyuyata mepikaheutahaxiani».

⁹ Rawiri kiekari 'aixia mireukunametsie yukie kanayeitiani meta Rawiri kiekariena katiniteriwa. Meta waritana kuraru 'a'atitewame kanawewietiyani, kwie mutahiniyarietsie 'itsutiaka paratsiyu manuwe paiti ye'akame,

¹⁰ matsi waikawa tirikariya hexeyati kanayeiximekaitini, Yawé Kakaiyari Naimekimitirikaie hamatiana muyeikakaiki.

11 Hiramí Tiru kwieyaritsie ti'aitame, Rawiri kaneni'airieni yuniuki tuayamete, meta kariuxa kiyeyari kaneni'ani, kiyeki memite'uximayatawawe meta tetexiki te'uximayatamete, ti'aitame paratsiyuya memitawewieniki.

12 'Ana Rawiri mipai katinetimani, Yawé yuteiterima wanaki'erieti, ti'aitame meyeitia 'ixaheritsixi wahetsie meta 'ayeumetsie mitita'aitaki mipitiakai.

13 Kepauka Rawiri Hewuruni kiekariyaritsie mayetia Kerutsaremtsie pita munua, tawarita hipame kaniwarutiwitini 'ukari tuxexerimama memaki meta 'iitamama, miki wahetsie tawari niwemama mekanayenexiani 'ukitsi meta 'ukari.

14 Mana yuniwema miwarayexei mipai mekatenitetewaka: Tsamuha, Tsuwawi, Natani, Tsarumuni,

15 'Iwikaxi, 'Eritsuha, Nepeki, Kapiha,

16 'Eritsama, 'Erihara meta 'Eripereti.

Rawiri pirtsiteutsixi kemitiwara'iwaxi

(2Tsam 5:17-25 - 1Kem 14:8-17)

17 Hiki pirtsiteutsixi yametehetimaika kename Rawiri hatseiti 'ukawiriyarieikai 'Ixaheri kwieyaritsie ti'aitame mayaniki, hiki 'ayumieme yunaiti mepayeki me'itamienike, peru Rawiri retimaika kaneyani yukiekari 'aixia mireukunametsie.

18 Pirtsiteutsixi mekanu'axiani, mayeweritsie Xepahini mirayetewatsie mekanukuyaxixiani naitsarie.

19 Hiki Rawiri Yawé mipai katiniuta'iwawiya:

—¿Piritsiteutsixi netiwatakwinini? ¿Tirikariya penetipitiani nemiwara'iwaki?

Yawé mipai katinita'eiya:

—Keniwarutakuya, nekamenipitiamiki pemiwara'iwaki.

²⁰ Hiki Rawiri kaneyani mana kaniwaretakwinini kaniwara'iwa. 'Ayumieme mana Rawiri Wahari-Peratsini* katiniuteriwa, mipai 'utayika: «Yawé kaneutahani memitatsi'aye'unie watsata, haa waikawa mitirikaiye hepai».

²¹ Piritsiteutsixi mana yukakaiyarixi mekaniwaruku'eirieni, hiki Rawiri meta kuyaximama mekaniware'ini.

²² Merikite piritsiteutsixi tawarita mekaniu'axiani Rawiri metamienike, mayeweri Xepahini mirayetewatsie mekaniukuyaxixiani naitsarie.

²³ Hiki tawarita Rawiri Yawé kaniuta'iwawiya.

Yawé mipai katinita'eiya:

—'Akuxi pepikawarutakukuyani, wawarita xekenekikini waritsamu kiyexiyari maku'u xekeneu'axia, hiki mana wawarita pita xekenayenexiaka xekeniwarutakuya.

²⁴ Kepauka yuarika pemi'enieni kuyaxi muwa memeuhuni hepai wapaiti kiyexi kitsita, 'ana xekanayekinikuni xemiwatakwiniki, miki pi'iniari ne Yawé ne'anuyekaiti 'ahixie nepumieni kuyaxi piritsiteutsixi nemiwakwiniki.

²⁵ Rawiri mipai katiniuyurieni Yawé yemeki kemitita'aitiakai, hiki piritsiteutsixi kaniwara'iwa

* 5:20 5:20 Hepirayuki panuyine huye kutsiyari.

mekaniwarukwini Kawahuni[†] mewayeweyaka
Ketsehexi paiti mekaniwaye'atiani.

6

*Rawiri tiratu kakuniyari Kerutsareme
kemirekwei*

(2Tsam 6:1-19 - 1Kem 13:1-14, 15:25-16:3)

¹ Merikitsi tawarita, Rawiri yukuyaxima
kaniwarukuxeirieni 'aixia memi'anene
memeuyutakwiwawe 'Ixaheri kwieyaritsie
kiekatari, xeitewiyari heimana tamamata
miriyari mekaniyupaimekaitini,

² hiki yunaime yukuyaxima warawititi
kaneyani Wará paiti Kura kwieyaritsie, mana
Kakaiyari tiratuya kakuniyari memanukweniki,
tiratu kakuniyari hetsiena memehiawe
miki kemititewaki, Yawé Naimekimitirikaiye
yuteitamete wahixiata miti'aita.

³ Merikite Kakaiyari kakunieya kaxeta hek-
wametsie mekananutiteni, hiki mekaneitini 'Aw-
inarawi kie mekaniyekweni, miki yemuritsie ka-
niukateitini. 'Awinarawi niwemama 'Utsa meta
'Akihi kaxeta mihekwa mekanehana

⁴ Kakaiyari kakunieya matikikai. 'Akihi kakuni
hixie 'anuyekaiti kaniumiekaitini,

⁵ meta Rawiri meyunaiti teiteri 'ixaheritsixi
Yawé hixie mekatenukaketsinakaitini
waikawameki meyutemamawieti meta
me'utikwiti haripa 'etsimupe meta 'amupa
hayuanekaku, tepu 'etsimiyeyeu, kaitsate meta
tepia mutitiraurika.

[†] 5:25 5:25 Xeime xapayaritsie hepirayuki 'ena paine Kehewa.

⁶ Hiki kepauka Nakuni tiriku matikatse meye'axiaka, tuurutsixi mekanetiketamirixiani, hiki 'Utsa yumamaki Kakaiyari kakunieya kaniutuika.

⁷ Hiki 'ayumieme, Yawé kaniuyeha'ani 'Utsa hepaitsita mimayiaki, 'ana mana kwitiwa katinikwinitiani, 'Utsa 'akaniukaweni Kakaiyari kakunieya 'aurie mikiti.

⁸ Rawiri kaniuyeha'ani Yawé 'Utsa mumiekaiki, 'ayumieme mana Peretsi-'Utsa* katiniuteriwa, hiki 'akuxi mana mipai katinakutewaka.

⁹ 'Ana Rawiri Yawé waikawa 'ayemakati kanayani, mipai kaniutayini: «'Aixia piyini matsi Yawé kakunieya xika nekahekweni».

¹⁰ Mikayuwa'iriyakaikiri Yawé kakunieya manukweniki yukiekaritsie, katiniuta'aita pita 'Uweri-'Erumi kie mihiiyaniki, Kahati kiekame hetsia.

¹¹ Mipai tiyiku Yawé kakunieya haika metseri kaniuyurieni 'Uweri-'Erumi Kahati kiekame kie 'ukaiti, hiki Yawé 'ana miki 'aixia kaniyuriekaitini meta yunaime tii'riyamama.

¹² Kepauka ti'aitame Rawiri mipai mitiuxatiarie kename Yawé kakunieya 'Uweri-'Erumi kie mukateiki 'aixia wayuriekai tii'riyamama meta naime tita mirexeiyakai, hiki Rawiri kaneyani 'Uweri-'Erumi kie, Kakaiyari kakunieya kanayekweni Rawiri kiekariena paiti kani'atiani waikawa temawierikatsata.

¹³ Kepauka Kakaiyari kakunieya memakwekai 'ataxewi keyari memiye'uwekaitsie, Rawiri

* **6:8 6:8** Hepirayuki *Peretsi-'Utsa panuyine 'Utsa mirakwinitiarie.*

turu xeime kanikumemiwakaitini meta xeime tsikeru muwaiya, mawari memakineki Yawé hetsiemieme.

¹⁴ Rawiri xeime xeikia 'anakatiti mawari wewiwame kamixaya 'etsiminena rinu 'ixurikiyariki miwewiya, katiniutineitiyani Yawé hixie waikawameki yutemawieti.

¹⁵ Mipai mekatetikweiximekaitini Yawé kakuneya yunaiti 'ixaheritsixi meta Rawiri, hiwaritsata metatsiere muxatsi wa'awate me'ihitsieximeti.

¹⁶ Hiki kepauka Yawé kakuneya Rawiri kiekarieyatsie meutahaximekai, Mikari Tsahuri niweya yukiitsie wapaiti kananiere, hiki kepauka Rawiri muxei 'utitsukwakame meta tineineme Yawé hixie, waikawa kanitixani'erieni.

¹⁷ Yawé kakuneya Rawiri 'ixuriki kiiyari kanitawewiriekaitini, muwa kaneitatani. Hiki muwata Rawiri mawari taiyariyari kaniyetuirieni meta 'aixia memiteyuxeiyaki mawariyari.

¹⁸ 'Arike mawari taiyariyari 'uwewiekari meta 'aixia memiteyuxeiyaniki mawariyari, Rawiri Yawé Naimekimitirikaiye kaniutawawirieni teiteri yunaime 'aixia miwayurieniki,

¹⁹ meta 'ixaheritsixi yuxexuime mana memiyuxeiriekai memiyumiirekai 'ukitsi meta 'ukarawetsixi, paa kaniwarutamini, taki 'ikwaxiyari patsaruyari tsuirayari, meta kaxie patsaruyari papayari. 'Arike mipai tiyiku, yukie yunaiti mekaneutayeixiani.

²⁰ Kepauka Rawiri munua yukie 'aixia wayurienike yutiriyama, Mikari Tsahuri niweya kaneikunake, mipai katinitatieni:

—Neuxei hiki 'aixia pepika'iyi. 'Ixaheri kwieyaritsie ti'aitame kemitiuka'iyari hepai pepika'iyi. Pemutitsukwakakaitsie 'ukari te'uximayatamete 'awarita mepimatsixeyakai. Tewi tixaiti mikatihiki hepai pepiyanekai.

²¹ Hiki Rawiri mipai katinita'eiya:

—Ne yuriki Yawé hixie nekaniiyanekaitini, kemi'ane minetsi'anayexei 'apaapa hetsiemieme meta 'aiwama, 'ixaheritsixi nemitiwata'aitianiki, Yawé teiterimama. 'Ayumieme Yawé hixie nepitiukaye'ani.

²² Peru matsi tawarita 'akuxi tixaiti nepikarayuyeitiani, 'eki kepemikatiku'eriwa, peru hiki miki te'uximayatamete 'ukarawetsixi pemwaraxaxata mariweme mepinetsi'ayeitiaka.

²³ Hiki Mikari Tsahuri niweya tiri kawarayex-eiyaka kaniumini.

7

Kakaiyari Rawiri kemitiutahiawixi (2Tsam 7:1-17 - 1Kem 17:1-15)

¹ Hiki ti'aitame Rawiri kepauka yuparatsiyuta 'ayekaiti matia, Yawé 'uxipiya kanipitiani yunaiti memeye'unie memika'i'uximatiakaki.

² Hiki Rawiri Natani Kakaiyari niukameya mipai katiniutahiawe:

—Neixei, 'aixia pika'ane ne paratsiyuta nemayeka kariuxa kiyeyari kiiyarita, Kakaiyari tiratuya kakuniyari, 'ixuriki kiiyarita 'ayekaikaku.

³ Natani mipai katinita'eiya:

—'Aixia kani'aneni. 'Eki ti'aitame yaketineuyuri
kepemi'ti'akuhiawe, Yawé matsi 'ahamatia kani-
uyeikani.

⁴ Hiki miki tikariyaritsie Yawé niukieya Natani
hetsia kaninuani mipai katinitahiawe:

⁵ «Kenemie mipai ketinetahiawi Rawiri
neti'uximayatsiriwame Yawé mipai kanaineni:
“'Eki pepikahiki kii pemnetsitawewirieni
muwa nemayekaniki.

⁶ Kepauka 'ixaheritsixi 'Ekipitu
nemwarayewititsie paititi hatsuaku kiita
nepika'ayeyerwe, matsi xeikia nepukuyeika,
'ixuriki tukiyarita ne'ayekaiti.

⁷ Kepaimexia tukari 'ixaheritsixi
wahamatia nemuyeikakai, kepauka 'itsikate
nemwarutani'a neteiterima 'ixaheritsixi
memiwata'iwiyaki, hatsuaku miki xeime
nepika'utati mikanetsi'utawewiriki kariuxa
kiiyari”.

⁸ »Kamitsi, Rawiri neti'uximayatsiriwame
mipai ketineutahiawi, mipai kanaineni
Yawé Naimekimitirikaiye: “Ne muxatsi
pewahinekaku nekamananayexeiya, matsi pita
neteiterima 'ixaheritsixi pemitiwata'aitianiki.

⁹ Ne 'ahamatia nepuyeikakai tsepa
kepemitikuyeikakai, 'ahetsiemieme
memimatsi'aye'unie yunaime nekani-
warakuxitiani. Hiki waikawa pemariweme neka-
manayeitiamiki 'ena kwiepa memimamariwawe
wahepai.

¹⁰ Meta neteiterima 'ixaheritsixi
nekaniwayetuiiemiki kwie, mana yuheyemeki
memititeniki 'aixia 'iyari mekamariutsieti.

Mana memiwaraye'unie mepikawa'uximatiakari
meripaiti kememiwayuriekai,

¹¹kepauka 'itsikate nemiwaranuka'uitiwakaitsie
neteiterima 'ixaheritsixi wahetsie. Meta 'eki
nekamanipitiamiki kayuwati pemuyeikaniki
yunaimemimatsi'aye'unie watsata.

»"Peru hiki Yawé mipai kamatinahiaweni
yapemitimaikaki miki kamanipitiamiki 'anui-
wari kii manukuketianiki.

¹²Kepaukari pemimini meta kepauka
'apaapama wahamatia pemikateukieni,
'anuiwaritsie xeime nepanayexeiya mitita'aitaki,
meta yamitiyurieniki.

¹³Miki pihikitini kii nehetsiemieme
mitawewieni muwa 'aixia nemitimariwaniki
meta heitserie nepipitiani yuheymeki
miti'aitaniki.

¹⁴Ne paapaya nepihikitini, mikita neniwe
pihikitini. 'Ayumieme kepauka 'axamitiyurieni,
nekaneyemari'itiamiki ne'iwaiyiki, rapaapa
mitiuka'iyari hepai.

¹⁵Peru ne'inaki'erietu nepika'ihayewa,
Tsahuri kenemitiuhayewaxi hepai, 'eki pita
hetsiena mieme heitserie nemimatsipitianiki.

¹⁶'Anuiwarima yuheymeki 'aixia 'anemeki
mepu'uواني nehixie, 'a'uweni yuheymeki
'apuweni».

¹⁷Hiki Natani Kaka'iyari niukameya Rawiri
'iki naime katiniutaxatiani, kemitiutahekiatiarie
heinitsi hepai 'anemeki.

Rawiri nenewierieya

(2Tsam 7:18-29 - 1Kem 17:16-27)

¹⁸ Hiki Rawiri ti'aitame kaneyani Yawé tiratuya kakuniyari hixie 'utayerika mipai katinitahiawe:

«Yawé meta Kakaiyari, ¿kepaiki ne nepihiki meta netiiriyama, titayari mariweme pener-ayeitiwani?

¹⁹ Yawé Kakaiyari, waikawari pepinetiupitia, kamitsi hiki miki 'etsiwa xeikia tihiki 'ahepaitsita. Ne mati'uximayatsiriwame nekanihikitini, waikawa pepinetiutaxatia ke'aixia pemitiyurieni 'arike nenuiwari wahetsiemieme. Yawé Kakaiyari teiteri wahetsiemieme mariweme pepitiyuriene.

²⁰ »¿Kehepai tawarita mati'uximayatsiriwame Rawiri matitahiawe yapekatinimaikari, 'eki Yawé nekakaiyari?

²¹ Mariwemekiki 'iki pekatiniuyurieni 'aniuki pehaye'atiati, kemimatinake hiki ne mati'uximayatsiriwame peminetiutahekiatia.

²² »Pepimariwe 'eki, Yawé naimekimiyiwe. Tame mipai tekatenetimani xewiti kaniumaweni 'ahapai tirikaiyeti meta tawarita yuri kakaiyari pumawe.

²³ Hakewatsi nuiwari 'ateiterima 'ixaheritsixi wahapai me'aneti mepe'uwa. 'Iki nuiwari xeikia pekaniuxina 'ena kwiepa, 'ateiterima pewarayeitianike meta wahetsie pemetimatiwaki kepemitiwariwe. Mariwemekiki pekatiniuyurieni kepauka 'ateiterima wahixie, 'Ekipitu kwieyaritsie kepemitiutawikweitsitia, nuiwarite kanantari kepemitiwarayeweyaxia meta wakakaiyarixi.

²⁴ 'Ixaheri kwieyaritsie pekatiniuwiya 'ateiterima yuheyemekiki memihikitiniki meta 'eki

Yawé wakakaiyari pemihikitiniki.

²⁵ »Hiki Yawé meta Kakaiyari heitseriemeki yaketineuyuri ne mati'uximayatsiriwame kepeminetiutahiawixi meta nenuiwarima wahetsiemieme. 'Aniuki kenaye'atia

²⁶ teiteri memimatsimaikaki yuheyemeki kemi'ane pemihiki, meta yunaiti 'aixia memutiyaneniki 'ahepaitisa mipai me'utiyuati: “Yawé Naimekimitirikaiye 'ixaheritsixi kaniwakakaiyaritini”. Hiki ne Rawiri mati'uximayatsiriwame nehikiti nenuiwari yuheyemeki ahixie kaniyuhayewakamiki.

²⁷ »Yawé Naimekimitirikaiye 'ixaheritsixi wakakaiyari, 'eki mati'uximayatsiriwame meripaiti pepinetiutahekiatia nenuiwaritsie kepemitiyurieni, 'ayumieme ne mati'uximayatsiriwame miyanematinikihaweni.

²⁸ Yawé nekakaiyari, ne mati'uximayatsiriwame waikawameki kepeminetiutaxatia 'aixia miti'aneki, 'eki pekanikakaiyaritini meta kepemutayi kaniyuritini.

²⁹ Neuxeitsi ne mati'uximayatsiriwame neniwema 'aixia keniwaruyuri, mipai 'eki pewa'iwiyakaku yuheyemeki mekaniu'uwakakuni nenuiwarima, 'ekitsi Yawé naimekimiyiwe yapekaniutayini. Xika nenuiwari 'aixia pewaruyurieni yuheyemeki 'aixia me'itiarieti mepuyuhayewani».

Rawiri kemirayu'iwaxi
(2Tsam 8:1-14 - 1Kem 18:1-13)

¹ Hiki yapaimexia 'anukayaku, Rawiri pirit-si-teutsixi kaniwarutakwini kaniwara'iwa, hiki miki tiwa'aitiati kanayani meta kaniwarunawairieni Meteki-'Ama kiekariyari.

² Yaxeikiata muhawitsixi kaniwara'iwa, wairiyarika kaniwarupitiani kwiepa memitihiniki meta kaunari ti'ininiatameki kaniwaruti'iniata, miki kemi'ane huta 'iniariyaritsie memitekunanakekai kaniwakukuyakaitini, matsi hairieka 'iniariyaritsie memitekunanakekai me'ayeneniereme kaniwaruhayewa. Mipai tiuyiku muhawitsixi Rawiri mete'uximayatsirieti mekanakine meteyukutuayati hetsiana.

³ Hiki Rawiri Harari-'Etsexi kana'iwa, ti'aitame Xekuwi nu'aya Tsuwa kiekame, Harari-'Etsexi kepauka metia hatuxame 'Eupirate manuyeka kwieyaritsie 'aurie mana tiwiya.

⁴ Rawiri xeimiriyari kaxetatsixi kaniwarunawairieni, 'atahuta miriyari kawayutsixi wahetsie memutei, meta xetewiyari miriyari kuyaxi yi'ikama memuhukai meta kawayutsixi mekaniwarutiwiteni wateuritetsie naitсата matsi xeitsienituyari kaxetatsixi wahetsiemieme kaniwaruhayewa.

⁵ Kepauka tsiriyutsixi Ramatsiku kiekatari Harari-'Etsexi hetsia memu'axia me'iparewienike Tsuwa miti'aitametikai, Rawiri miki xetewiyari heimana huta miriyari kaniwarukwini.

⁶ Yaxeikiata Ramatsiku kiekariyaritsie kuyaxi tehiwemete kaniwaru'uitiani, hiki tsiriyutsixi Rawiri mete'uximayatsirieti mekaniyuhayewa

meteyukutuayati hetsiana. Naitsarie kemitiyumienekai Rawiri katinayu'iwakaitini Yawé 'iparewiekaku.

⁷ Hiki kimana memiyukunarima huruki miwewiyatika Harari-'Etsexi parewiwamete memi'ikai Rawiri yuhetsiemieme katinayeitiani Kerutsareme paiti katinepini.

⁸ Metatsiere tiwaikawa wurunitse tepiayariki mitiwewiyatika katinetini Tewaki mexuawekai meta Werutahi, Harari-'Etsexi kiekariena.

⁹ Tuhu, Kamati kiekariyaritsie ti'aitame mipai piritima kename Rawiri yunaime Harari-'Etsexi kuyaximama wara'iwakai.

¹⁰ Mikita Tuhu Harari-'Etsexi kanaye'uniekaitini, 'ayumieme yuniwe Kurani kaneni'ani Rawiri ti'aitame hetsia 'aixia mireitahiaweki, Harari-'Etsexi ma'iwaxiki. Kurani katinepini pirataki mitiwewiyatika, huruki meta wurunitseki.

¹¹ Hiki ti'aitame Rawiri miki Yawé katiniyetuirieni, hetsienamieme mirayaniki yaxeikia kemitiuyuri hipame nuiwarite tiwa'aitiati matia wapirataki meta wahuruki:

¹² 'Erumi, Muhawi, 'amunitsixi, pirsitsiteutsixi meta 'amarekitsixi. Meta Yawé katiniyetuirieni Harari-'Etsexi tiwapiini mitiwarenawairi, ti'aitame Xekuwi nu'aya Tsuwa kiekame.

¹³ Rawiri matsi waikawa kaniutamariwa kepauka makunua mayeweritsie Maye'unaya heyukumieka, muwa tamamata heimana 'atahaika miriyari 'erumitsixi kaniwarekwini.

¹⁴ Yaxeikiata 'Erumi kwieyaritsie kuyaxi tehiwemete kaniwaru'uitiani, naitsarie miki kwieyaritsie Rawiri tiwa'aitiati kanayani, hiki

miki 'erumitsixi Rawiri hetsia meteyukutuayati mekanakine. Naitsarie kemitiyumienekai Rawiri katinayu'iwakaitini Yawé 'iparewiewekaku.

Rawiri parewiwametemama

(2Tsam 8:15-18 - 1Kem 18:14-17)

¹⁵ Rawiri 'Ixaheri kwieyaritsie naitsarie katini'aitakaitini, yunaimé teiteri pitiwa'aitiakai 'aixia 'anemekí yiki katiwaxeiyati hipame meta heitseriemeki yatiyurieneti wahetsiemieme.

¹⁶ Kuhawi Tsariwiya nu'aya, kuyaxi tiwa'aitiwame pihikitikai, Kutsapati 'Akiruri nu'aya, ti'utiwame pihikitikai ti'aitame hetsiemieme,

¹⁷ Tsaruki 'Akituwi nu'aya meta 'Akimereki 'Awiyataxi nu'aya, mawari wewimete mepihikitikai, Tserahiyaxi kemitiuyi miraka'utiwa pihikitikai,

¹⁸ Wenahiyaxi Kuyara nu'aya, miki kuyaxi Rawiri hiwemete kereteutsixi meta pereteutsixi pitiwa'aitiwametikai. Mikita Rawiri niwemama 'ahurawa 'iparewiwamete* mexiakate mepihikitikai.

9

Rawiri Mepiwutseti matia

¹ Merikitsi ti'aitame Rawiri kaniuti'iwauni xika 'akuxi xewiti Tsahuri nuiwarieya 'uyeikakaitini para 'aixia miyurieniki Kunatani ha'eriwati.

* **8:18 8:18** Hepirayuki panuyine mawari wewiwamete tatsiari 'iparewiwamete.

² Hiki Tsahuri tiriya mama xeime mekanex-eiyakaitini memite'ihiritiakai yupiinite miki Tsiwaha pititewakai, miki miwitikiemieki mekatenu-tani'ani. Kepauka Tsiwaha Rawiri hixie munua, mipai katinita'iwawiya:

—¿Tsiwaha 'eki petihiki?

Miki mipai katinita'eiya:

—Huu, nenepihiki mati'uximayatsiriwame.

³ Ti'aitame tawarita kanita'iwawiya:

—¿Xewiti 'akuxi katiyuhayewane Tsahuri nui-warieya? Kakaiyari pinetsi'uyuitia waikawa nemiparewieniki.

Tsiwaha mipai katinita'eiya:

—Huu, ti'aitame. Kunatani 'akuxi niweya xewiti puyuhayewane muhurie yu'ikatetsie.

⁴ Ti'aitame mipai kaniutayini:

—¿Hakewa peka?

Tsiwaha mipai katinita'eiya:

—Ru-Rewaxi paiti. Makixi 'Amiheri nu'aya kie kanekani.

⁵ Hiki ti'aitame Rawiri katiniutani'ani miwawiemieki Makixi 'Amiheri nu'aya kie, Ru-Rewaxi paiti.

⁶ Kepauka Mepiwutseti Kunatani nu'aya meta Tsahuri teukarieya Rawiri hixie munua, kaniutihiximakeni kwiepapai.

Rawiri mipai katinita'iwawiya:

—¿'Eki Mepiwutseti petihiki?

Miki mipai katinita'eiya:

—Huu, nenepihiki mati'uximayatsiriwame.

⁷ Hiki Rawiri mipai katinitahiawe:

—Pepikamaka, matsi 'apaapa Kunatani neha'eriwati, nepinewairiya 'aixia

nemimatsiyurieniki. Naime nemaniyetuiriemiki kwie 'ateukari Tsahuri manuyeikakaitisie meta hikiri 'ena mautiyune nepimatimikwani nemexatsie timieme.

8 Mepiwutseti mipai katinitahawe 'utihiximakeka:

—Ne ti'a'uximayatsiriwame tixaiti matsi nepikatihiki, tsiki mimiki hepai xeikia nekani'aneni.

9 Hiki Rawiri Tsiwaha mipai katiniutahawe, Tsahuri parewiwameya:

—Naiti ketipaimeti Tsahuri mati'aitiwame mitipiinieyatikai meta tiriyamama, teukarieya Mepiwutseti nekatiniyetuirieka.

10 Mipai nekatini'aitiaka kwieya keneka'etsani hetsiena mieme, mitiutixuxuawere pepitiuti'utani kiena kiekatari memitekwakaki. 'Aniwema tamamata heimana 'auxiwi memiyupaume mekematsi'uparewieni meta xeitewiyari te'a'uximayatsiriwamete. Matsi mati'aitiwametikai teukarieya, nemexatsie katiniutikwa'amiki yuheyemeki.

11 Tsiwaha mipai katinita'eiya:

—Ti'aitame ne nepinewairiya nemimatita'uximayatsirieniki. Naimeki yanekatiniyurimiki kepeminetita'aitiani.

'Ana mitiyetia Mepiwutseti Rawiri mexayat-sie titikwa'ati kanayani, ti'aitame munu'ayatini hepai.

12 Yunaiti Tsiwaha tiriyamama Mepiwutseti mekateni'uximayatsiriekaitini. Mepiwutseti yuniwe xeime kanexeyakaitini Mikahiyaxi titewakame.

13 Mepiwutseti Kerutsareme kaniukateitini, yu'ikatetsie muhuriekaiki, mana ti'aitame mexayatsie katiniutikwa'akaitini.

10

*Rawiri 'amunitsixi kemitiwara'iwaxi
(2Tsam 10:1-19 - 1Kem 19:1-19)*

¹ Hiki yapaimexia 'anukayaku 'amunitsixi tiwa'aitiwame kaniumini, nu'ayata Kanuni kanitsutiani ti'aitati.

² Merikite Rawiri mipai katiniu'erieni: «Peuyewetse 'aixia nemitixeyaniki Kanuni Nakaxi nu'aya, nehamatia paapaya ketemiteyuxewikai hepai». Hiki niuki tuayamete kaniwareni'ani, memenitianiiki paapaya mumikaiki.

Kepauka Rawiri ni'arimama, memeta'axia 'amunitsixi wakwieyaritsie,

³ mana kiekatari ti'aitame Kanuni parewiwamete mipai mekatenuutahiawe: «ǂ'Ekiri yuri petiwa'eririe 'iki niuki tuayamete Rawiri muwareyeni'a, memimatsinitianiiki 'apaapa hepaitsita? Matsi kaniwareyeni'ani 'akiekari memixeyaki memiyi'iwiyaki 'arike memika'unaki».

⁴ Hiki 'ayumieme Kanuni katiniuta'aita Rawiri hetsiamiemete memanutaxiriyaniiki meta wamixiya mataxiriexianiiki hixiata 'atikaime yaxeikiata wa'ixuriki hixiapa memitsanaxianiiki wakitsapapai 'uku'atikaime. Hiki 'anake kaniwarayeni'ani.

⁵ Rawiri teiterimama waikawameki mepiyutetewiyakai. Hiki Rawiri kepauka yamiretima kememite'anuyekinekai, yuniuki

tuayamete kaniwareni'ani memiwanakiyuki,
meta 'iki niuki memiwareyetuirieniki
hetsienamieme: «Keriku xekeneyuhayewani,
kwitiwa 'uxepikahahuni kepaukake xemi xiya
metiwawere».

⁶ Yametehetimaika 'amunitsixi Rawiri
hepaitsita ke'axamemite'uyuriekai, miki
tiratu mekaniutiwewieni te'aitamete wahetsia
kuyaxi memiwarani'airieniki pirataki:
tsiriyutsixi Weti-Xekuwi kiekatari meta
Tsuwaha kiekatari, xeitewiyari miriyari kuyaxi
mekaniyupaimekaitini yi'ikama memuhu,
Mahaka ti'aitame kuyaximama xeimiri yari meta
Tuwi kuyaximama tamamata heimana huta
miriyari mepiyupaimekai.

⁷ Rawiri kepauka yamiretima, Kuhawi kaniu-
tani'ani meta yunaime kuyaximama.

⁸ Hik i' amunitsixi yukiekari kitenie meka-
niuyukuxeirieni meta mekaniyukuha'aritiani
memiyukwi yuki, tsiriyutsixi Tsuwaha
kiekatari meta Xekuwi kiekatari yateewa
mekaniyuhayewakaitini 'amakuyewatsie,
Tuwi meta Mahaka wateiterima wahamatia
mekaniyuhayewa.

⁹ Hik Kuhawi kepauka mipai miretima kename
me'ayehutakai memiwaraye'unie, 'ayumieme
kuyaxi 'ixaheritsixi memeuyutakwiwawe kani-
waranayexeiya tsiriyutsixi memiwatakwiniki,

¹⁰ miki kuyaxi memiyuhayewaxi yu'iwa 'Awit-
sahi kaniuhiritiani mitiwata'aitianiki, 'amunitsixi
memiwatakwiniki.

¹¹ 'Awitsahi mipai katiniutahiawe: «Xika
tsiriyutsixi metatsiha'iwarimeni, xeme
xekanahuni xemitatsiparewieniki, xikata

'amunitsixi mexeha'iwarimeni tameta
tekanixeparewikuni.

¹² Xepikamamaka. Tekaniyutakwikuni
tetawairiyati tateiterima wahetsiemieme meta
takakaiyari kiekariteya hetsiemieme. Yawé
yaketiuyurieni kemitinake».

¹³ Hiki 'ana kwitiwa Kuhawi meta kuyaxi-
mama mekanekine tsiriyutsixi mewatakwinike,
miki mekaniyuta'unaxiani mewaruxeiyaka.

¹⁴ Tsiriyutsixi kememiteyuta'unakai
mewaruxeiyaka, yaxeikiata 'amunitsixi 'Awitsahi
memakati mekaniyuta'unaxiani yukiekaritsie
mekaniyuti'awietaxiani. Hiki 'ayumieme
Kuhawi katiniuhayewa 'amunitsixi watakwinike,
Kerutsareme kanakunuani.

¹⁵ Hiki tsiriyutsixi mipai metehetimaika
kememiteha'iwariekai 'ixaheritsixi wahepaitsita,
tawarita mekanuyukuxeirieni.

¹⁶ Metatsiere Harari-'Etsexi katiniwaru-
tani'airieni tsiriyutsixi memeyukuha'aritaniki
'Eupirate hatuxameyari 'anutaie memititekai,
miki matsi Kerani paiti mekanekine Tsuwaki
yatiuta'aitaku, kuyaxi tiwa'aitiwame Harari-
'Etsexi hetsiemieme.

¹⁷ Kepauka Rawiri yamiretima 'iki hepaitsita,
'ixaheritsixi yunaime kaniwarukuxeirieni, Ku-
rutanitsie me'ukineka Kerani paiti mekanekine.
Tsiriyutsixi 'aixia mekatenuyu'uitiani Rawiri
hepaitsita, 'ixaheritsixi mekaniiwarutakwini,

¹⁸ peru mekaniyuta'unaxiani 'ixaheritsixi
mewamakati. Rawiri 'atahuta tsienituyari
kuyaxi kawayatsixi wahetsie memutekai
kaniwarukwini meta huta tewiyari miriyari

yí'íkama memuhukai. Meta Tsuwaki kuyaxi tsiriyutsixi tiwa'aitiwame kaniumieni.

¹⁹ Mipai metehetimaika tsiriyutsixi 'ixaheritsixi kememitewara'iwakai, te'aitamete Harari-'Etsexi memiparewiekai, 'ixaheritsixi wahamatia tiratu mekaniuwewieni kayuwati memexeinyaniki meta mekaniyuyetuaní wahetsiemieme memite'uximayakaki. Hiki hatsuakuri tsiriyutsixi 'amunitsixi memiwaparewieniki mepikaheki.

11

Rawiri Wetitsawe hamatia

¹ Merikitsi kepauka taxarita maye'a te'aitamete memayekikakai meheuyukwiyu, Rawiri Kuhawi kaniutani'ani kuyaxi wa'ukiyari, yunaime kuyaxi 'ixaheritsixi wahetsia miemete 'amunitsixi memiwatakwiniki meta Xawaha kiekariyari warie memayaxetikineki. Peru Rawiri Kerutsareme kiekariyaritsie kaneyuhayewa.

² Hiki heiwa 'utaikaikaku Rawiri yu'itaritsie 'anukukeka, yuparatsiyu heima kani-uyeikakaitini, manapaiti 'uyeikati 'ukaratsi kaniuxeiya 'iwaneme. 'Ukaratsi kwinimieme katini'iimarikaitini.

³ Rawiri katiniutani'ani kemi'ane mihikitikai timaimiti, hiki mipai katiniutaxatarieni: «Wetitsawe kanihikitini, 'Eriyani niweya meta 'Uriyaxi 'iyaya heti tewiyari».

⁴ Hiki Rawiri katiniuta'aita hetsiana mi'atarieniki, kepauka Wetitsawe mi'atarienie miki hamatiana kaniukahuni. 'Ariketa yukie kaneyani. Wetitsawe pikareutewikai 'akuxi xuriya mita'axiyakaitsie 'uyu'itieka,

5 hiki 'ayumieme kaniutihukata meta Rawiri katiniutaxatiani mipai mitimaikaki.

6 Hiki Rawiri Kuhawi 'iki niuki kaneni'airieni: «'Uriyaxi heti tewiyari kenenani'airi». Kuhawi mipai katiniuyurieni.

7 Kepauka 'Uriyaxi munua, Rawiri kanita'iwawiya Kuhawi kemireyurienekai meta kuyaxi kememitehe'uximayakai meheyukwitiweti.

8 Hiki mipaita katinitahiawe: «'Akie kenemie 'a'ia hamatia kenekahu'i». Kepauka miwayetia paratsiyuta, 'Uriyaxi 'imikieri katiniyetuiriyarieni ti'aitame yatiuta'aitaku.

9 Peru 'Uriyaxi yukie pikahetia matsi paratsiyu kitenie, kuyaxi ti'aitame hiwemete wahamatia pukaatei.

10 Hiki Rawiri yakatinetimani 'Uriyaxi yukie mikahetiaki, mipai katinita'iwawiya:

—'Ateewa pepeyetia. ¿Ketitayari 'akie pekaretia?

11 'Uriyaxi mipai katinita'eiya:

—Kakaiyari tiratuya kakuniyari meta yunaiti kuyaxi 'ixaheritsixi meta Kura kiekatari 'ixuriki xamaruyaritia yeuta mekanekuteni, meta neti'aitiwame Kuhawi metatsiere 'iparewiwametemama, 'aixia pika'ane ne nekiita nemiye'ani witsinemitiukwa'ani meta ne'ia hamatia ne'ukahuputi. Yuriki Ti'aitame hixie ne mipai nekanaineni nepikayawe mipai nemiyaneni.

12 Rawiri mipai katinitahiawe:

—'Aixia kani'aneni, hiki 'ena keneuyuhayewa, 'uxa'ake nepimatsi'anuni'ani 'a'utima.

'Uriyaxi miki tukaritsie Kerutsareme kaniyuhayewa. Hiki 'uxa'arieka,

13 Rawiri 'ikwai 'ixiarariyari pa kanita'inieni hiki mana kanititawaitiani. Peru miyatiti yaxeikia 'Uriyaxi yukie pikahetia matsi yaxeikia kuyaxi tehiwemete mematihipitetsie 'ukaiti kaniukatari-yarieni.

14 Hiki 'uxa'arieka ximeri Rawiri Kuhawi xapa kaniuta'utirieni, 'Uriyaxi 'utima kaneini'ani.

15 Xapa mipai payetainekai: «'Uriyaxi kenanuyeyetsa, hakewa matsi waikawa memeyukwitiwetsie. Hiki yuxaitame xekenehayewa metsekieniki meta memierieniki».

16 'Ayumieme kepauka Kuhawi kiekari warie memaketiki, Kuhawi timaiti hakewa memayenexianiekai waikawa memeuyutak-wiwawe, 'Uriyaxi mana kaniutikeni.

17 Hiki kepauka mana kiekatari memayeki Kuhawi metamienike, hipati Rawiri parewi-wamete mekaniukwi'iwa, yaxeikiata 'Uriyaxi heti tewiyari kaniumierieni.

18 Hiki Kuhawi Rawiri niuki kaneini'airieni naima hepaitsita rexaxatiwati kememiteyutakwikai.

19 Mipai katinihiritiani yuniuki tuayame: «Kepauka naima pemireitaxatiani ti'aitame ketemiteyutakwi hepaitsita,

20 xika miki heyeha'ame mipai meretahiawe: “¿Titayari kwinimieme 'ahurawa xetehaki kiekari warita xewaretakwinike? ¿Xekatemaikai tami kiekari kuraruyaritsie me'aka'uti memixetiminiekai?

21 ¿Kemi'ane 'Awimereki pumi Yeruwetseti nu'aya? 'Ukaratsi katiniuyurieni wapaiti 'akaweti Tewetsi kuraruyari 'amatitewatsie teté titixime maheteki mana kaneikatuaxa kimana kanimieni. ¿Ketitayari 'ahurawa xete'uki 'ixumeri 'amatitewa hetia?" Xika mipai mareta'iwawiya, mipai ketinetahiawita: "Metatsiere 'Uriyaxi hetu tewiyari kanemierieni, 'eki ti'aitame mati'uximayatsiriwame"».

22 Hiki Kuhawi niuki tuayameya kaneyani. 'Uta'aka yapauka Rawiri naime katiniutaxatiani Kuhawi kemireitaxatiakai.

23 Tewi niuki tuayame mipai kaniutayini:

—Kuyaxi memitatsi'aye'unie mekatana'iwarimekaitini, peru kepauka 'amakuyewatsie temu'axia tekani-waranukuweiya kiekari kiteniepai tekani-waye'atiani.

24 Hiki temimimete wapaiti kurarutsie memaka'ukai 'akuyaxima mekaniwaretamini, hiki 'ana ta'iwama yayupaimeti mekanekwi'iwa. Yaxeikiata 'Uriyaxi hetu tewiyari kanemierieni, 'eki ti'aitame mati'uximayatsiriwame.

25 Merikite Rawiri yuniuki tuayame mipai katiniutahiawe:

—Kuhawi mipai ketinetahiawi nehetsiemieme waikawa 'axapikareyikihaweni kemireyi hepaitsita, 'ixipara matsi pitiumemiwa tsepa kemi'ane. Mipai ketinetahiawi tawarita hekwareki kewartakwini mana kiekatari, kepaukake miki kiekari naime meka'una.

²⁶ Kepauka Wetitsawe mitiutamari kename kinaya 'Uriyaxi hemieriekai, 'ana yuhiwerieti kanayani hetsiena mieme.

²⁷ 'Arike yuhiwerieti tiuhayewaku, Rawiri katiniutani'ani paratsiyuta mi'atiarieniki hiki kanitiwitini meta nunutsi kanayexeiya hetsiena mieme. Rawiri kemitiuyuri matsi Yawé pika'inakixi.

12

Natani Rawiri kemitiutati (2Tsam 11:1, 12:29-31 - 1Kem 20:1-3)

¹ Merikite Yawé Natani kaneni'ani Rawiri hetsia mititaxatianiki. Kepauka miki Kakaiyari niukameya Rawiri hixie munua, mipai katinitahiawe:

—Teiteri yuhutati xeime kiekaritsie mekantitekaitini. Xewiti waikawa pirexeiyakai, xewitita tixaiti pikarexeiyakai.

² Xiku waikawa muxatsi piwarexeiyakai meta wakaitsixi,

³ peru tixaiti mikarexeiya muxa xeime xeikia pexeiyakai 'inaneka meta mitaweriyakai. Miki muxa hamatiana putawerekai meta niwemama wahamatia. Xakiyatsie pititikwa'akai, watsutana pitiharewekai meta heikukwekaku kaneukukut-sukaitini. Miki tewi yuniwe hepai pitimaikai yumuxa.

⁴ Peru 'arike mipai katiniuyini, xewiti 'iwatame xiku hetsia kaninuani, hiki mirexeiya xeime yumuxa kamiemiti meta yuwakaxi 'iwawatame mitiminiki, tewi muxa xeime xeikia mexeiyakai kaniunawairieni.

⁵ Hiki 'u'enaka Rawiri waikawa kaniuyeha'ani miki xiku hepaitsita, 'ayumieme Natani mipai katiniutahiawe:

—Yuriki Yawé hixie mipai nekanaineni, miki tewi miya mireyuri kaneuyeweka mimierieniki.

⁶ Meta katinayukatuamiki naukakia muxa kemiraye'akai, miya mitiuyuriki meta mika'itinenimayataxiki.

⁷ Merikite Natani Rawiri mipai katiniutahiawe:

—'Ekitsi miki tewi pekanihikitini. Yawé mipai kanaineni, 'ixaheritsixi wakakaiyari: “Ne ti'aitame nekamanayeitiani 'Ixaheri kwieyaritsie pemitita'aitaki meta nekamaniutawikweitsitiani Tsahuri matsimiemikikaku.

⁸ Mati'aitiwame paratsiyuya nekamaniyetuirieni meta 'iitamama nekamaniyetuirieni. Yaxeikiata 'Ixaheri kwieyaritsie meta Kura kwieyaritsie nekamaniupitiani pemitita'aitaki. Xika 'iki matsi 'etsitipaimekaitini, matsi tawarita nekamatinietuirienikekaitini.

⁹ ¿Merikite titayari Yawé niukieya petiutixani'eri, yapetiyurieneti tita mikanetinake? 'Uriyaxi heti tewiyari pekaniumieni 'iyaya pewitimiti. 'Amunitsixi wa'ixiparaki pekanimieni.

¹⁰ 'Ayumieme hipati 'anuiwarima 'uxa'atiniwarie mepitakwikwiwani 'ixiparaki, pemintsu'utatawe'eriki meta 'Uriyaxi heti tewiyari 'iyaya 'a'iya pemayeitiaki”.

¹¹ »Yawé mipai kanaineni: “Ne yanekatiniyurimiki 'anuiwarimatiti mepihikitini memimatsi'uximatiani, penierekaku 'a'itama

neniwayetuamiki xeime hetsia, miki matsi tukariki wahamatia kanikahuimiki.

¹² 'Eki 'awie kepe^mtiuyuri, ne yanekatiniyurimiki hekita 'ixaheritsixi yunaime wahixie”».

¹³ Rawiri Natani 'u'enieka mipai katinetimani, 'ayumieme mipai kaniutayini:

—Yawé hixie 'axanekatiniuyurieni.

Hiki Natani mipai katinita'eiya:

—Ke'axapem^mtiuyuri Yawé ka-matineuyehiwirieniri, mikiki pepikamini.

¹⁴ Peru 'aniwe xeikia kanimimiki, yapetimaiti Yawé pmutatawe'eriki.

¹⁵ Mipai 'utayika, Natani yukie kaneyani. Hiki Yawé kwiniya nunutsi kaniupitiani 'Uriyaxi 'iyaya meyexei Rawiri hetsiemieme, nunutsi waikawa katiniutakwine.

¹⁶ Rawiri Kakaⁱyari kaniwawiriekaitini hetsienamieme yuhakieti, tikariki kwiepa 'ukaiti tihiximaweti kaniukatariyariwakaitini.

¹⁷ 'Ukirawetsixi 'iparewiwamete mekanix-eiyatiwekaitini me'i'inieti manukukeniki, matsi miki pikawaku'eniwakai meta wahamatia mitikwaniki kaniyuku'imawakaitini.

¹⁸ 'Atahuta tukari 'anukayaku, nunutsi kaniumini. Rawiri parewiwamete mekanimamakaitini memite'itaxatianiki, matsi mipai mekanikutiyuanekaitini: «Kepauka nunutsi mayenierekaitsie ti'aitame temikihawekaitsie mikatatsiku'eniwakai, hiki matsi mipai xika tete'itahawe kenameri nunutsi hemi yiki katiyurieni?»

19 Rawiri matsi yuparewiwamete waruxeiyaka 'axikai memitekuxatakaiki, katinetimani kemitiuyikai mipai katiniwaruta'iwawiya:

—¿Nunutsi remiri?

Mipai mekatenita'eiya:

—Huu, kaneminiri.

20 Hiki Rawiri kwiepa 'anukukeka kwitiwa kaniuti'owa witsimu'ia kaniuyutawirieni, hiki yutikemaritiaka Yawé tukita kaneyani nenewieri 'ipitianike. 'Anake paratsiyuta nuaka, katiniuta'aita 'ikwai memitehekatu'irieniki, hiki katinuikwani.

21 'Iparewiwamete mipai mekatenita'iwawiya:

—¿Kehepaititiri miya pepiyiane? Kepauka nunutsi mayenierekaitsie 'eki matsi pekaniyuhakiekaitini meta petiutatsuakakai, hikita matsi kutana 'eki pe'anukukeka petikwa'a.

22 Rawiri mipai katiniwaruta'eiya:

—Kaniyuritini kepauka nunutsi mayenierekaitsie nekaniyuhakiekaitini neyuheiwerieti, mipai netiku'eriwati: “Xewiti pikatimate. Heiwati Yawé netsi'utinenimayata nunutsi 'upitiani mitaniereki”.

23 Hiki matsi mumi, ¿titayari netinehakieka? ¿Netiyiwekuta tukari ne nemipitianiki? Miki nehetsia munuani pikayiwari. Nepita 'uxa'atini nekaniyemieni hakewa miki metia.

24 Hiki Rawiri yu'iya Wetitsawe kanekunitiani meta hamatiana kaniukahuni. 'Ariketa nunutsi mekanayexeiya xeime, Rawiri Tsarumuni katiniteriwa. Yawé nunutsi waikawa naki'erieti kanayani,

25 hiki yuniukame Natani kaniutani'ani Keririyaxi* memiteheiteriwaki.

26 Merikite 'akuxi Kuhawi 'amunitsixi wakiekari Xawaha kanimienekaitini peru ti'aitame muwayekateitsieri kana'iwakaitini.

27 Hiki yuniuki tuayamete kaniwareni'ani Rawiri mipai memitehetahiaweki: «Xawaha kiekariyari nekaniutamieni, nekanikunaka wahaputsu memiwatihaniwetsie,

28 hiki 'ayumieme 'eki ti'aitame nekamani-wawirieka kuyaxi memeyuhayewaxi yunaime pemwarawitini kiekari pemika'unaki. Mexika katixaitini ne yanetiniyurimiki meta kenemititewa yakatinitateriwariemiki».

29 'Ayumieme Rawiri kuyaxi yunaime warukuha'aritiaka Xawaha kiekariyaritsie kaneyani, kanitamieni meta kane'iwa.

30 'Amunitsixi tiwa'aitiwame kuruna manamakai huruki muwewiya kaninawairieni, miki xeitewiyari heimana tamamata heimana haika kiruyari katineuhanakaitini meta tetexi witsimi'anene kaneukatekaitini. Hiki Rawiri pita mekananutiketsirieni. Meta Rawiri miki kiekaritsie mekanitahaxiani piinite waikawa mekateneipini.

31 Hiki mana kiekatari kaniwarayeweiyaxiani xaitsie pita, katiniwaruta'uximayatsitiani kiyexi xiteyariki, tepia manuyemitsiki memite'uximayakaki meta hatsaki, yaxeikiata wairiyarika kaniwarupitiani xinariya matitaiyariwa memite'uximayakaki. Naitsarie

* 12:25 12:25 Keririyaxi hepīrayuki panuyine Yawé minaki'erie nunutsi.

mípaí katiniuyurieni 'amunitsixi wahetsia, hiki mípaí tiu'aitaka Kerutsareme kanakunuani yunaime yukuyaxima wahamatia.

13

'Aminuni Tamaxi matia

¹ Hiki yapaimexia 'anuyeyaku mípaí katiniuyini. 'Awitsaruni Rawiri nu'aya yu'iwa 'uka kanexeiyakaitini witsiti'iimarikame Tamaxi titewakame. Xewitita Rawiri nu'aya 'Aminuni kanitihiwe'eriení.

² Matsi Tamaxi mi'iimaritikaiki, 'Aminuni katiniutakwine yuhiaweti mípaí tiku'eriwati mikwaniwekaiki yamitiyurieniki kemitiku'eriwakai hetsiena mieme.

³ Peru 'Aminuni yuhamiku kwinié timaiweme kanexeiyakaitini Kunarawi titewakame, Tsimaha kaninu'ayatikaitini meta Rawiri kanimatsuyatikaitini. Kunarawi

⁴ 'Aminuni mípaí katiniuta'iwawiya:

—¿Titayari 'eki ti'aitame penu'ayatiti kwiniemieme petiyixime petikuye? ¿Titayari pekaneraxaxatiwa kepemiti'akuhiawe?

Hiki 'Aminuni mípaí katinita'eiya:

—Neriki Tamaxi nepihiwe'erie, ne'iwa 'Awitsaruni iwaya.

⁵ Kunarawi mípaí katinita'ikitiani:

—Keneu'akwinima pemitikuyeni hepai ketinekani 'a'utatsie. Kepauka 'apaapa mimatsixeyamie mípaí ketineutahiawi: "Ximixi ne'iwa Tamaxi pamie mineramimieki. Ne nekaneixeyamikini 'uwa 'ikwai neti-wewiriekame meta pinerapiniriwani".

6 Hiki 'Aminuni kaniukahuni yukwinimati.
Kepauka ti'aitame meikuxeí, mipai katinitahiawe:

—Ximixi ne'iwa Tamaxi pamie hutame tiriku
tsuirayari minetsitiwewirieniki meta miki
minetiminiki.

7 Hiki Rawiri yuniuki tuayame ka-
neni'ani Tamaxi kie mireitaxatiani, mipai
mireitahiaweki: «'A'iwa 'Aminuni kie kenemie
meta 'ikwai ketinekawewiri».

8 Tamaxi yu'iwa 'Aminuni kie kaneyani
yu'utatsie hekakaikame kanetaxeíya. Yapauka
tiriku mitixiyari kaniuhawiya hutame tsuiraxi
kanitiwewirieni meta kanitikwaxíya.

9 Hiki xakitsie 'ikamanaka kanei'irieni, peru
'Aminuni matsi kaniyuta'imani katikwaimiti
mipai pita katiniuta'aita:

—Yunaiti takwa xekenanuyekini, xeime tima
nepikaheuxeíyamiki.

Yunaiti mewayekinekuke,

10 'Aminuni Tamaxi mipai katiniutahiawe:

—'Uwapaiti nemuyekukutsutsiepai kene-
nata'iiri, meta 'eki kenetineumikwa.

Miki tsuira mutiwewiekai henaka'ika, yu'iwa
'Aminuni kane'irieni kiitana paiti,

11 peru kepauka 'ahurawa mutia timinike, miki
karima kaniwiya mipai katinitahiawe:

—Ne'iwa hikimi, nehamatia keneukahu'i.

12 Miki mipai katinitahiawe:

—Ne'iwa, ketineuhayewa pepikanetsinanaimaka,
'ixaheritsixi mipai tepikateyurie.
'Axapepikatiyurieneni.

¹³ Xika mipai penetsi'uyurieni ne 'anepuyeikani neyutewiyati. ¿'Ekita kepe'aneni? 'Eki 'Ixa-heri kwieyaritsie 'axatiyuruwame hepai xeikia pepitixeyarieka. Ne nepimatsiwawirie ti'aitame hamatia pemititaxataki, yuriki mipai nepaine miki pikata'imali 'a'ia nemayaniki.

¹⁴ 'Aminuni matsi pika'i'eni, karima 'iwiyaka mikatirikaieyekaiki hepaina, wairiyarika 'ipitiaka hamatiana kaniukahuni.

¹⁵ Peru 'arike 'Aminuni 'ikumayiakake kanitixani'erieni, meripaiti waikawa kemitihiwe'eriekai, hikitapita waikawa matsi kanitixani'erietiyani. 'Ayumieme mipai katinitahiawe:

—Kenanukukekari keneumieni.

¹⁶ Tamaxi mipai katinita'eia:

—Pepikanetsi'anuyehipani. Miya
peminetsi'uyuri, hikita 'akuxi xika
penetsi'anuyehiani matsi waikawameki
'axapekatiniyurimiki.

Peru miki pika'enu'eni,

¹⁷ matsi pita tiyu'uximayatsiriwame 'uta'inieka mipai katinita'aitiani:

—'Iki 'ukaratsi kenanuyehiwa, xikari
pe'enuyehiani kitenie ketineukuketsa.

¹⁸ Hiki ti'uximayatame takwa kanenuyehiani, kitenie katineunani.

Tamaxi kamixa 'amitewi 'amimamatetiti kananakatikikaitini, mipai mana ti'aitame niwemama 'imarixi mekateniu'iwikaitini.

¹⁹ Hiki naxi yumu'utsie heutiwiwieka meta yukamixa heukatsanaka, yumu'utsie heutimeti huyeta kaneyani 'utatsuati karima.

²⁰ Hiki 'iwaya 'Awitsaruni mipai katinitahiawe 'iniati:

—ǃ'A'iwa 'Aminuni 'ahamatia rekahui? Merikite kayuwati keneuyeikani netaru, keneyuniatiaka meta 'atsipepikahaineni, kani'a'iwatini 'atsitemite'uyurieni tepikayiwawe.

Yuhiwerieti xeikia Tamaxi 'Awitsaruni kie kaniyuhayewa.

²¹ Kepauka Rawiri ti'aitame mitiutamari naime kemitiuyikai hepaitisa, waikawa kaniuyeha'ani.

²² 'Ana mitiyehane 'Awitsaruni 'Aminuni pikakuhiawekai, matsi kanixani'eriekaitini 'iwaya Tamaxi hamatia mukahuiki.

'Aminuni kemitiumierie

²³ Merikitsi huta wiyari 'anuyeyaku, 'Awitsaruni kaniwaruta'inieni yunaime ti'aitame niwemama 'ixiararipa, Wahari-Katsuxi paiti, 'Epirahini kwieyari manuka'atika heuhurakaku, mana teiterimama muxatsi mekaniwarexitiwekaitini.

²⁴ Meta 'Awitsaruni ti'aitame hetsia kaniye'ani mipai katinitahiawe:

—'Eki ti'aitame, ne ti'a'uximayatame nehikititi nete'uximayatamete nekaniwarexeiyani texikamete. Ne nekamaniwawirieka memitehaxitiwetsie pemimieki meta 'aparewiwamete.

²⁵ Ti'aitame mipai katinita'eiya:

—Tixai neniwe Tanaiti temaukine tepikayiwawe matsi pekaneti'uxiweni petaremiti.

'Awitsaruni waiyiarika kanipitiakaitini, ti'aitame matsi pikayuwairi miyemieki, mipai xeikia katinitahiawe Kakaiyari kexehe'iwiyani.

²⁶ Hiki 'Awitsaruni mipai katinitahiawe:

—'Ekiri ti'aitame pemikamieki, ¿'aixia katiyinikeyu ne'iwa 'Aminuni xika heuyanike mitatsiheteitaki?

Ti'aitame mipai katinita'iwawiya:

—¿Titayarikuta 'ahamatia mimieki pereiyehiwa?

²⁷ Peru 'Awitsaruni ti'aitame wairiyarika kaniupitiani, 'ayumieme ti'aitame kaniwarupitiani 'Aminuni meta hipati niwemama 'Awitsaruni 'utia memiyehuki.

²⁸ 'Iki 'Awitsaruni yuhetsia te'uximayatamete mipai katiniwaruta'aitiani: «'Aminuni xekenex-eiyani xepikaheiyehipani. Kepaukari waikawa mitawekatsie ne yanekanitayimiki kepauka xemenukuweiya hiki xeme xekaneimiekuni. Xepikaheumamaka ne matsi nekanihikitini mipai nemixeti'aitia. Xekeneyuwairiyani xekenetirikawini».

²⁹ Te'uximayatamete yamekateni-uyurieni 'Aminuni hepaitsita 'Awitsaruni kemitiwaruta'aitia. Hiki hipati ti'aitame niwemama mekananuku'uni, yuxexuti yumuratsixi wahetsie me'anutiyaxixiaka mekanekine meyuta'unake.

³⁰ Hiki 'akuxi huyeta yateewa mekaniuhukaitini Rawiri kepauka niuki mu'eni: «'Awitsaruni ti'aitame niwemama yunaime kaniwarekwini. Miki nixewiti 'ayeniereti pikayuhayewaxi».

³¹ 'Ana ti'aitame 'anukukeka, yukamixa kaneukatsana hiwerika 'inariyari kanayeitiani, meta kwiepa kaniuhuni. Yaxeikiata 'iparewiwamete yunaiti hamatiana memu'uwakai yukamixa mekaneukatsanaxiani.

³² Kunarawi Tsimaha nu'aya Rawiri matsuya, mipai katinitahiawe:

—'Eki ti'aitame yunaiti 'aniwema mehekwi'iwame pepika'erieka, matsi 'Aminuni xeikia kane'itarieni. 'Awitsaruni yakatinimaikaitiniri kepaukapai 'Aminuni Tamaxi mukumayiatsie taruya.

³³ 'Eki ti'aitame niukitsie yuri pepikati'erieka kename 'aniwema yunaiti mehekwi'iwaxi, matsi 'Aminuni xeikia kanemierieni.

³⁴ Neniereme kiekari mita'iwiyi, mana kaneutaniere huyeta meta tau manukayuyupiketsie neutaniere muh'iriyatsie, mana mekanakahukaitini yumireti. Hiki ti'aitame mipai katinekihiawe: «Kurunahini huyeyaritsie teiteri mekanakahuni muh'iriyatsie». Mexi 'Awitsaruni yuta'unakai.

³⁵ Hiki Kunarawi ti'aitame yakatiniutahiawe:

—Kami 'eki ti'aitame, 'ena 'aniwema mekaniuti'axeni kenemimarahiawekai.

³⁶ Hiki mipai metekuxatati mete'anuniku ti'aitame niwemama mana mekanatanexiani karima me'utitsuati, hiki ti'aitame meta 'iparewiwametemama mekanitsutiani me'utitsuati mekayunitiariniati.

³⁷⁻³⁸ 'Awitsaruni kepauka muyuta'unaxi, Tarimahi hetsia kaneyani heyuti'awietake 'Amihuri nu'ayatsia, Ketsuxi kwieyaritsie ti'aitame mihikitikai. Haika wiyari mana kaniuyuhayewa. Rawiri matsi yuniwe 'Aminuni hetsiemieme kaniutitsuakakaitini tukariki,

³⁹ kepaukata 'Aminuni kemitiumi hepaitsita muyunitia, kanitsutiani 'Awitsaruni hauseiyamiti waikawameki.

14

'Awitsaruni Kerutsareme kemitinua

¹ Merikitsi Kuhawi Tsariwiya nu'aya yakatineti-
mani ti'aitame Rawiri 'Awitsaruni waikawameki
muku'eriwakaiki.

² 'Ayumieme katiniutani'ani 'uka
miwitikiemieki waikawa mitimaiwe, miki
Tekuha mirakutewatsie kaniukateitini, mipai
katinitahiawe:

—Yuheiweriekame hepai ketineu'akemaritia,
witsimu'ia pepika'akawiriwani, matsi
yuheiweriekame hepai kene'aneni, 'aniwe
mumini hepai.

³ Hiki Kuhawi mipai katinita'aitiani ti'aitame
hetsia mimieki, tita'ikitiaka kemireitahiawe.

⁴ Kepauka miki 'ukaratsi Tekuha kiekame
munua ti'aitame hixie, kananakatutsire
kwiepapai kaniutihiximakeni.

Mipai katinitahiawe:

—'Eki ti'aitame, keneneuparewi.

⁵ Ti'aitame mipai katinita'iwawiya:

—¿Kekuta tita perayexeiya?

Miki mipai katinita'eiya:

—Tixaiti nepikarexeiya, nepinexaita, nekina ka-
niumini.

⁶ 'Eki ti'aitame ne ti'a'uximayatsiriwame
yuhutame neniwema nekaniwarexeiyakaitini,
miki mepuyutakwi yeuta me'u'uwati, matsi xewiti
mumawekaiki miwata'imaiyaki, miki xewiti
yu'iwa kaniumieni.

⁷ 'Ayumieme ne'iwama yunaiti mekane-
naye'unieka, ti'aitame ne ti'a'uximayatsiriwame.
Mekaneniwawirieka nemiyetuaniki

memimieniki mitiuyumiki, mipai
 mirayukatuaniki yu'iwa kemitiumi, xika
 mipai mete'uyurieni nexaitame mekaneni-
 hayewakuni. Yuriki mipai nekanaineni
 xika mipai mete'uyurieni nekina nuiwarieya
 kaneuyewemiki kemititewakai 'ena kwiepa.

⁸ Ti'aitame mipai katinita'eiya:

—'Akie kenemie, ne'aixia nekatiniyurimiki miki
 hepaitsita.

⁹ Hiki 'ukaratsi Tekuha kiekame, mipai ka-
 tinita'eiya:

—'Eki ti'aitame, miki naiti nehetsie kerahiyani
 meta netiiriyama wahetsie, ti'aitame 'ahetsie
 pikatixai meta pemira'aitatsie.

¹⁰ Ti'aitame mipai katinitahiawe:

—Xika xewiti matsihe'uximatiaka keneneu-
 taxatia, tawariri pikamatsihe'uximatiaka.

¹¹ Hiki 'ukaratsi mipai katinitahiawe:

—'Eki ti'aitame nekamaniwawirieka Yawé
 takakaiyari keneutawawiri, neniwe xewiti
 mukakumemiwaniki.

Ti'aitame mipai katinita'eiya:

—Yuriki Yawé hixie mipai nekanaineni, 'aniwe
 'atsipika'itiarieni.

¹² Matsi 'ukaratsi katihayewati mipai
 katinikihawekaitini:

—'Eki ti'aitame ne ti'a'uximayatsirime 'ahetsia
 nemimieme keneneupitia ximixi matsi tawarita
 nemimatitaxatianiki.

Ti'aitame mipai katinitahiawe:

—Ketineutaxata.

¹³ 'Ukaratsi mipai kaniutayini:

—'Eki ti'aitame Kakaiyari teiterimama
 'axapepikawayurieka. 'Eki 'aniukiki 'ahetsie

pepirahipa, 'aniwe 'ateewa metia pemikapitiaki munuaniki yukie.

14 Haa xika 'utayeuriani kwiepa pikayiwe tawarita mikuhanini, mipai yaxeikiata tanaiti tekanikwikuni. Peru matsi Kakaiyari tatukari pikatatsikunawairiwa, matsi pita katinikuwauneni 'ateewa muyeika yuheyemeki 'ateewa mika'uyeikaniki.

15 »'Eki ti'aitame 'ahamatia netitaxatake ne nekaneyeyani, teiteri waikawa mepitekuxata menetsimariutati. Mipai nepire'eri: "Ti'aitame hamatia nepiretaxata, heiwati netsihe'enieni ketita nemireitawawirieni,

16 'aixia tatsiyurieti ne meta neniwe memitatsikwiku wahepaitsita, tahetsie mitiyuhayewaki Kakaiyari ketita mitatiyetuiri".

17 »Metatsiere mipai nepire'eri, niukieya xiari 'aixia netiku'eriwame pinetsi'ayeitiani, 'ekitsi ti'aitame niuki tuayame Kakaiyari hetsia mieme hepai pekani'aneni, pemitimaiwe tita 'aixia miti'ane meta 'axamiti'ane hepaitita. Yawé 'akakaiyari 'aixia kematsiyurieka.»

18 Hiki mipai tiuxataku, ti'aitame mipai katinitahawe:

—Nepimatsita'iwwiwa, peru nekamani-wawirieka yuriki yapepinetitahawe.

'Ukaratsi mipai katinitahawe:

—'Eki yakenetineutahiwi.

19 Ti'aitame mipai katinita'iwwiwa:

—¿Wa'ati Kuhawi mipai merahiawekaku pemu-taine?

'Ukaratsi mipai katinita'eiya:

—Mípai kani'aneni, ti'aitame, Kuhawi
mati'uximayatsiriwame 'íki naime
kanetineta'íkitiani kenemítayíníkekai.

²⁰ Míki mípai pítiuyuri para 'aixia
pemítíyurieníki. Peru 'ekí ti'aitame waíkawa
pekatini maiweni niuki tuayame Kakaiyari
hetsia mieme hepai, naime pekatinakumaíka
'íki kwieyarítsie kemítíyiane.

²¹ Híki ti'aitame Kuhawi 'uta'íníeka mípai katini-
tahiawe:

—Meríkíte yanekatína'eriwani. Kenemie
yaketineyuri 'Awitsaruni neniwe munuaníki.

²² Kuhawi kwiepa kaniutihíximakeni ti'aitame
híxie, Kakaiyari kaniutawawirieni 'aixia
miyurieníki, mípai tikíhiaweti:

—Pamípariyutsi nepímatsipítia neti'aitíwame
tita nemímatiutawawiri yapemítíuyuríki.

²³ Mípai 'utayíka, Kuhawi Ketsuxi kwieyarítsie
kaneyani, meta Kerutsareme kanakunuani 'Awit-
saruni hamatia.

²⁴ Ti'aitame matsi mípai katiniuta'aita:
«Yukie keheyani meta hatsuaku pikahamieni
netsiku'iwataneti». 'Ayumieme 'Awitsaruni yukie
kaneyani ti'aitame hetsia kaye'aka.

²⁵ Naitsarie 'Ixaheri kwieyarítsie tewi
pumawekai 'aixia tiyuxexeiyatí 'Awitsaruni
kemítíyuxexeiyakai hepai, 'aixia pí'anekai naití
kemutewíki.

²⁶ Kipaya kwini mieme pírahetekai,
xeíwíyarítsie heíwamieme pikaxíkakai kwínie
miraheterekaíki kípatéya, kepauka kípatéya
mikaxirie memíku'iníniatakai huta kíruyari
píraheterekaí.

27 Metatsiere, 'Awitsaruni yuhaikame yuniwema 'ukitsi kaniwarexeiyakaitini meta xeime 'uka. 'Uka Tamaxi pititewakai, kepauka 'iimari matia mikita witsiti'iimariti patia.

28 'Awitsaruni Kerutsareme 'ukaiti huta wiyari kaniuyurieni ti'aitame hixie kaheta'axeti.

29 Hiki 'Awitsaruni heiwa Kuhawiki katiniutani'ani ti'aitame hetsia mimieki, matsi Kuhawi pikayutawairi mimieki. Tawarita kanitani'ani, Kuhawi matsi kaniyuta'imali kayuwairiyati.

30 Hiki 'Awitsaruni yuhetsia miemete mipai katiniwaruta'aitiani: «Neuxei, Kuhawi tsewara kaniuka'eni nemati'etsatsie yateewa. Xekenehu xekenetataiya».

Hiki te'i'uximayatsiriwamete mehekineka Kuhawi 'etsarieya mekanetataiya.

31 Hiki Kuhawi kaneyani kwitiwa 'Awitsaruni kie, mipai katinitahawe:

—ǂKetitayari 'ahetsia miemete, ne'etsiya metehetataiyaxi?

32 Hiki 'Awitsaruni mipai katinita'eiya:

—Ne nepimatsi'utani'a nepimatsiwawirieka ti'aitame hetsia pemumieki meta pe-meita'iwawiyaki ketitayari Ketsuxi kiekariyaritsie nemeyeikakai nereyetia. Matsi 'aixia piyinikekai xika mana neheyuhayewake. Ti'aitame hixie nekanimieni, xika nehetsie tixuaweni, kenetsi'umieni.

33 Kuhawi kaneyani ti'aitame katinetaxatiani, hiki ti'aitame 'Awitsaruni miwitikiemieki katiniuta'aita, mikita ti'aitame hixie kaninuani, kwiepa 'utihiximakeka waikawameki

reiyehiwirieti. Matsi ti'aitame 'Awitsaruni
kaniutanake 'itsiyaki kanitawairitiani.

15

*'Awitsaruni Rawiri kemiraye'uniekai ti'aitame
'ayeimiti*

¹ Merikitsi yapaimexia tukari 'anukayaku, 'Awitsaruni kaxetate kuyaxa mieme kanikuwauni, yayupaimemeta kawayutsixi, yaxeikiata 'ihiwemete kuyaxi huta tewiyari heimana tamamata meyupaimeme kaniwarukuxeirieni.

² Ximeri meripaiti heyeikati huye tetsita kaniutakekakaitini, kiekari kitenie yatewa. Kepauka xewiti mana mutaneni ti'aitame hetsia hauyaka para 'aixia meiyurieniki 'uximatiarika kemirexeiya hepaitsita, 'Awitsaruni kanita'iniwakaitini 'iku'iwawiyati ke'aneme kiekaritsie meyeyakai. Miki xika yutahekiata kemi'ane 'Ixaheri nuiwaritsie mimieme,

³ 'Awitsaruni mipai katiniwakuhawekaitini: «Ketita pemirayexeiya 'aixia kani'aneni, peru matsi ti'aitame 'aixia mirakayuruwa pikahexeiya».

⁴ Mipaitatsiere 'Awitsaruni putainekai: «Xika tiyiwenike 'iki kwieyaritsie 'itsikameki ne'anukakerienike. Yunaiti kemi'ane 'uximatiarika mexeiyani yanutsutini 'iwairika, nehetsia mepiye'axenikuyu neta 'aixia nepirakayuruwanikuyu».

⁵ Metatsiere, xika xewiti 'itahiawe hixiena 'utihiximakeni, matsi 'Awitsaruni

kaniwaranukuhapanakaitini kaniwakuta-
pakaitini waikawa wanaki'erietí meta 'itsiyaki
kaniwawairitiakaitini.

⁶ 'Awitsaruni mipai kaniwayurienekaitini
'ixaheritsixi yunaime ti'aitame hetsia
memi'axekai para 'aixia miwayurieniki
ketita memitehayexeyakai, mipai teiteri
katiniwara'iwa wanaki'aritiati.

⁷ Nauka wiyari 'anuyeyaku, 'Awitsaruni
ti'aitame mipai katiniutahiawe:

—Ti'aitame keneneupitia Hewuruni kiekari-
yaritsie nemimieki, Yawé kenemitiutahiawixi
nemiraye'atiani.

⁸ Kepauka Ketsuxi 'Arami nemuyeikakaitsie,
mipai nekaniutayini: “Yawé xika netsi'upitiani
Kerutsareme nemakunuaniki, mawari nekane-
wewiriemiki”.

⁹ Ti'aitame mipai katinita'eiya:

—Kenemie peka'a'uximatiati.

'Awitsaruni kaneyani Hewuruni kwieyaritsie
paiti,

¹⁰ peru 'ana kwitiwa tupiritsixi kani-
wareutani'axiani yunaime 'Ixaheri nuiwarimama
wahetsia, mipai tiwarahiaweti: «Kwitiwa
kepauka kuxineta yuariyaya xeme'enieni,
mipai xeketenehiwa: “'Awitsaruni Hewuruni
kiekariyaritsie katini'aitametini”».

¹¹ Metatsiere 'Awitsaruni huta tsienituyari
Kerutsareme kaniwayewitini teiteri, miki
'atsimepikatemalaikai kehapai mitiyurimikikai.

¹² Hiki mexi'akuxi mawari 'ixiarariyari
wewiekai, 'Awitsaruni ti'aitame 'ixatsitiwame
kaniuta'inieni yupaapa Rawiri hetsia mieme, miki

'Akituperi katinitewakaitini meta Kiru kiekame kanihikitikaitini. Mipai Rawiri memaye'uniekai metirikaiyeti mekanakinirimekaitini, 'Awitsaruni memaweiyakai matsi waikawa mekanakinirimekaitini.

¹³ Xewiti tewi niuki tuayame Rawiri mipai katinekuxatiani: «'Ixaheritsixi yunaiti 'Awitsaruni mekaniutinini».

¹⁴ Hiki Rawiri yunaime memiparewiekai mipai katiniwarutahiawe Kerutsareme hamatiana memititekai:

—Hikimitika tekaniyehuni. Tekaniyuta'unakuni, tawarita yiki temiyini tepikayiwawe 'Awitsaruni hepaitisita temitata'unaki. Mexiima xeiya, teka'ayekiniwawekaku nuani. Xika tatsi'anuku'axe, haweri 'anekia pitatsitixirieni meta tateiterima yunaime 'ixiparaki kaniwakwimiki.

¹⁵ 'Iparewiwamete mipai mekaniutiyuani:

—'Ekitsi ti'aitame kepemaineni, tame xeikia yatekatenikakinikuni.

¹⁶ Hiki yapauka ti'aitame nayeyani yunaime yuparewiwamete warawititi, peru kaniwaruku'eirieni tamamata meyupaimeme yutuxexerima paratsiyu memi'iwiyaniki.

¹⁷ Kepauka paratsiyuta mayetia yunaime yuteiterima warawititi, kaniwakeni kiekari manunieretsiepai.

¹⁸ Yunaiti 'iparewiwamete mekanitinini. Hiki kereteutsixi, pereteutsixi meta 'ataxewi tsienituyari Kahati kiekatari Kahati paiti memeyeweyakai ti'aitame hixie mekanika'uni.

19 Ti'aitame 'Itahi Kahati kiekame mipai katini-utahiaawe:

—ǂ'Eki ketitayari tahamatia pereyetia? Keneukunua 'Awitsaruni ti'aitame hetsia kenemie, 'eki 'ateewa kiekame pekanihikitini meta 'akiekaritsie pekanayeni'arieni.

20 Nepikamatsipitia tahamatia pemiyemieki, 'eki pekaniye'akake, ne 'atsinepikatitude ketemiteheuyune. 'Ayumieme keneukunua 'ateiterima keniwarawititi. Kakaiyari 'ahamatia ke'uyeikani matsinaki'erieti 'aixia tiuka'iyariti.

21 Matsi 'Itahi ti'aitame mipai katiniuta'eiya:

—Yuriki mipai nekanaineni Yawé hixie meta 'eki ti'aitame, tsepa temekwi'iwaxi yatsepa temikahekwi'iwaxi, ne nepiyemie hakewa tsepa 'eki pemetia.

22 Ti'aitame mipai kaniutayini:

—'Aixia kani'aneni, kamitsi tahamatia kenemie.

Mipai 'Itahi Kahati kiekame tewiyari Rawiri teiterimama wahamatia katineyani meta tiiriyamama memeweiyakai wahamatia.

23 Hiki yunaiti teiteri mekaniutitsuanakaitini karima kepauka Rawiri mana muyemieikai yuteiterima wahamatia, kepauka ti'aitame Kiruni 'akiyaritsie manutia, teiteri yunaiti mekanitsutiani makumawetsie me'erieti.

24 Wahamatiata kaniumiekaitini Tsaruki, rewitsixi warawititi tiratu kakuniyari memakwekai Kakaiyari hetsia mieme. Hiki miki mana kakuni mekaniuka'uxipitiani kwiepa, hiki 'Awiyataxi mana mawari kaniuwewieni yunaiti teiteri kiekaritsie me'ayekinekuke katiniuhayewa.

25 'Arike ti'aitame mawari wewiwame Tsaruki mipai katiniutahiawe:

—Keneukunuitia kakuni Kakaiyari hetsia mieme kiekaritsie. Xika Yawé ne netsiparewieka, miki yapitiyurieni ne nemunuaniki tawarita nemixeyaki kakuni meta hakewa meka hiki.

26 Peru xika Yawé netsi'uku'eirieni, 'aixia kani'aneni tsepa, kemitinake nehetsie yaketiuyurieni kehapai matsi 'aixia mi'ane hepaitsitana.

27 Meta mipai katinitahiawe:

—'Eki matsi mitixeiya pepihiki, pepiyiwe pe-mukunuani kiekaritsie peka'a'uximatiti 'Awiyataxi hamatia, meta 'aniwe 'Akimatsi pe'awititi meta Kunatani 'Awiyataxi nu'aya.

28 Ne makumawetsie makuweritsie nepinehayewa kepaukake xeme niuki xeminetsihanuni'airieni kemireyaneni hepaitsita.

29 'Ayumieme Tsaruki meta 'Awiyataxi Kerutsareme mekaniukunuaxiani kakuni Kakaiyari hetsia mieme matia, mana mekaniyuhayewa.

30 Rawiri matsi, Huriwu hiriyaritsie kaneutiyune 'utatsuati, yumu'utsie 'anuyukanati meta heumamaweti. Yaxeikiata yunaiti keyupaimeti memeweiyakai yumu'utsie mekananuyukanaxiani meta me'utitsuati mekananutikine.

31 Merikite 'ana Rawiri katiniutaxatarieni ke-name 'Akituperi 'Awitsaruni Rawiri maye'unie hetinikai. Hiki Rawiri mipai katiniuyunenewieni:

«Yawé, yaketineuyuri yamikatiyiniki 'Akituperi kemitiku'eriwa».

³² Kepauka Rawiri hiritsie manune, mirayutinenewitiretsie Kakaiyari hetsiemieme, mana Hutsahi panukunakixi 'araki tewiyari, miki kemitiyuheiwerekai 'iniari pexeyakai kamixa menakatikikai kanitsanikaitini meta yumu'utsie kanimu'unaximakaitini.

³³ Rawiri mipai katinitahiawe:

—Xika nehamatia peheyani, nehetsie xeikia katinayeimiki.

³⁴ Matsi 'aixia piyini xika Kerutsareme peheyani, 'Awitsaruni mipai ketinetahiawi: “Ti'aitame, ne nepimati'uximayatsiriwametini. Meripaiti 'apaapa ti'uximayatsiriwame nepatia, matsi hikita 'ahetsia mieme nepihikitini”. Mipai xika pe'iyini pepinetsiparewieni 'Akituperi kemitiku'eriwa pemikaheipitiakaki.

³⁵ Mana mawari wewiwamete mepimatsihewarewieka Tsaruki meta 'Awiyataxi, merikite ketita pemire'enieni paratsiyuta pekatinwarekuxaxatiwamiki.

³⁶ Metatsiere mepimatsihewarewieka 'Akimatsi Tsaruki nu'aya meta Kunatani 'Awiyataxi nu'aya, miki xekeniwareni'aka meminetekuxaxatiwaniki tsepa tita 'umiraniereni.

³⁷ Hutsahi, Rawiri mihamikuyatikai, Kerutsareme kaninuani kepauka 'Awitsaruni kiekaritsie meutahaximekai.

16

Rawiri Tsiwaha matia

¹ Hiki hiritsie me'anunexiaka 'etsiwa 'ari yame'ahuti, Rawiri Tsiwaha kananukunake,

Mepiwutseti ti'uximayatsiriwame, yuhutame puxuri puwarahapakai me'u'ikame, paa huta tsienituyari, kaxie patsaruyari tsuirayari xeitsienituyari, xapa 'ikwaxiyari tsuirayari xeitsienituyari meta xeime nawi kuxa'riyaritsie kaxie winuyari.

² Ti'aitame mipai katinita'iwawiya:

—¿Keri petiyurieni 'iki naime?

Tsiwaha mipai katinita'eiya:

—Puxuri mepi'ayumiemete 'atiriayama memanutiyaxeki, paa yaxeikiata 'ikwaxi 'akuyaxima memitikwaniki pi'ayumieme meta kaxie winuyari kemi'ane memuti'uxikeni makumawetsie piwahetsiemieme.

³ Hiki ti'aitame mipai katinita'iwawiya:

—¿Hakewari mati'aitiwame teukarieya?

Tsiwaha mipai katinita'eiya:

—Kerutsareme peyuhayewaxi. Miki mipai hiki katiniku'eriwani kename 'ixaheritsixi ti'aitameki me'itahiawe teukarieya miti'aitakaiki.

⁴ Ti'aitame mipai katinitahiawe:

—Merikite, Mepiwutseti meripaiti naiti tita mitipiinieyatikai hikiri 'eki katini'apiinitini.

Tsiwaha mipai kaniutayini:

—Ne netini'a'uximayatsiriwametini neti'aitiwame. 'Aixia pekenetsiyurieka 'ayehemeki ti'aitame.

Tsimehi Rawiri hepaitisa ke'axamutainekai

⁵ Hiki kepauka Rawiri ti'aitame Wakurini munua, mana xewiti tewi kanayeneni Tsahuri nuiwarieyatiti, Tsimi titewati Kera nu'aya. Miki 'axatikihaweti kanitsutiani,

⁶ tetexiki Rawiri kanitituaxakaitini meta yunaime 'iparewiwamete meta tsepa kuyaximama ti'aitame 'aurie memawetikatei.

⁷ 'Itate'ati, Tsimi ti'aitame mipai katinikihiawekaitini:

—Keneumieni. Tiyumemiwame, pemikayukatewiya.

⁸ 'Aixia kani'aneni Yawé 'uximatiarika mimatsipitia Tsahuri tiriya mama pemwarukwiki. 'Ayumieme Yawé 'aniwe 'Awitsaruni pita ti'aitame kanayeitiani. 'Axa'anemetsie pekaniyukahiani. 'Ekita yaxeikia pepi'itarieni kepemitiuyuri pemiti'amiekameki.

⁹ 'Awitsahi Tsariwiya nu'aya ti'aitame mipai katinitutahiawe:

—ǂKehapaítiti 'iki tsiki mimiki puyuwairiya 'axamimatikihiawe neti'aitiwame? Keneneupitia nemimieki mu'uya nemanutixiteniki.

¹⁰ Ti'aitame matsi mipai katinita'eiya:

—Nehetsiemieme pepika'anuyehakeni Tsariwiya nu'aya. Matsi xiari Yawé yapireipitia 'axaminetitahiaweki. Mipai xika 'aneni, xewiti pikayiwe mita'imaiya.

¹¹ 'Awitsahi tikihiaweti meta yunaime 'iparewiwamete, Rawiri mipai kaniutayini:

—Metsi neniwetiti kanenimiemiini, matsi 'iki wenikamini tewiyari tsepa minetiumi. Xekeneyawewani 'axaminetikihiaweniki, Yawé matsi mipai katinita'aitiani.

¹² Yawé xiari yapitimate kenemitiuka'eniwa, 'aixia miti'aneki pita netinakapitiwani 'axamiti'aneki nehetsie kemirahiwa.

¹³ Rawiri meta teiterimama mekanitsutiani me'uhuti. Tsimi matsi 'aiwarita 'akuxi

kaniwaruweiyakaitini Rawiri 'axatikihaweti,
tetexiki 'ituaxirimeti meta tumuanari teiki
'utiwiwiwati.

¹⁴ Hiki ti'aitame meta kemi'ane memeweiyakai
'uxiyaki mekwiximetí mekaniu'axiani Kurutani
hatuxameyaritsie, manake mekaniuka'uxipieni.

Hutsahi 'ixatsieya meta 'Akituperi

¹⁵ Merikiteta, 'Awitsaruni meta 'ixaheritsixi
yunaiti memeweiyakai Kerutsareme
mekaneutahaxiakaitini, 'Akituperi yaxeikiata
kaneweiyakaitini.

¹⁶ Hiki Hutsahi 'araki tewiyari Rawiri
hamikuya, 'Awitsaruni hixie kaniutakeni hiki
mipai katiniuhiwa:

—Ti'aitame ke'ayeniereni. Ti'aitame
ke'ayeniereni.

¹⁷ Hiki 'Awitsaruni mipai katinita'iwawiya:

—¿'Ahamiku mipai petinaki'erie? ¿Kehapaititi tamí
'eki titayari hamatiana pekaretia?

¹⁸ Hutsahi mipai 'Awitsaruni katiniutahiawe:

—Hawaiki nekimana. Matsi ne Yawé menayexei
hamikuya nekanihikitini meta 'iki kiekaritsie
kiekatari memenayexei meta 'ixaheritsixi yunaiti.
'Ayumieme ne 'ahetsia nekaniyuhayewamiki.

¹⁹ Matsi ¿kemi'ane kuta tawarita
nepitita'uximayatsirieni? Nu'aya neka-
tinita'uximayatsiriemiki meripaiti 'ukiyarieya
kenemitiuta'uximayatsiri hepai.

²⁰ Mipaita 'Awitsaruni 'Akituperi katiniu-
tahiawe:

—Xekenetimamatekeni kehapai temiteyurieni.

²¹ 'Akituperi mipai 'Awitsaruni katiniuta'eiya:

—'Eki keneukahu'i 'apaapa tuxexerimama wahamatia, paratsiyu memihikaki miwaruku'eiri. 'Ana 'ixaheritsixi yunaiti mipai mekatene-timaikini kename 'eki ti'aitame 'apaapa pe'aye'uxiwe'erie, mipai memimatsiparewie mekanitirikariyariékuni.

²² Hiki 'ixuriki kiiyari mekaniutawewieni wapaii kii heima 'Awitsaruni yupaapa tuxexerimama wahamatia mikahuniki 'ixaheritsixi yunaiti me'ixeyiakaku.

²³ 'Ana 'Akituperi 'ixatsieya Kakaiyari 'ixatsieya hepai kani'anekaitini, Rawiri mipai katinei'eniekaitini meta 'Awitsaruni yaxaikia.

17

¹ Metatsiere 'Akituperi 'Awitsaruni mipai katini-utahiawe:

—Ne tamamata heimana huta miriyari kuyaxi nekaniwaranayexeyaweni, 'iki tikariyaritsie kwitiwa nekanayeyeiweni Rawiri nemiwaumieki.

² Miki kane'uxekamiki pikahetirikaiyeni, ne nepeitamiewe, waikawa nepeitimariutawe meta teiterimama nepuwaretaweyawe hamatiana meme'uwa. Meta ti'aitame xeikia nekanemieweni,

³ hipameta 'eki ti'aitame nekamani'atirieweni. 'Eki xeime tewi xeikia pepukuwaune miminiki xika mipai tiyini 'ana hipati mepi'axiani, hiki 'ana yunaiti teiteri kayuwati mehexeyati mepakine.

⁴ 'Akituperi kemitiuxa 'Awitsaruni kaninakire meta yunaiti 'ukirawetsixi 'ixaheritsixi,

⁵ Peru 'Awitsaruni mipai kaniutayini:

—Hutsahi 'araki tewiyari tekanitah*i*awikunita, tsipara mikita ketiku'eriwa.

⁶ Hutsahi kepauka munua, 'Awitsaruni mipai katinita*i*wawiya:

—ǂ'Akituperi kemitiuxataxi mipai teteyurieni? Xika katixaitini, ǂ'ekita kepehaine?

⁷ Hutsahi mipai 'Awitsaruni katiniuta'eiya:

—Hiki 'Akituperi kemaine 'aixia pika'ane.

⁸ 'Eki 'apaapa Rawiri pekanimaika yaxeikiata kuyaximama: waikawa mekaniy*w*aweni hiki matsi mekaneha'aka hutse yeutanaka yuniwema munawaiyarieni hepai. Metatsiere 'apaapa waikawa katinakumaika yumemiwame hepai, xiari tikariki yukuyaxima wahamatia pikaheyuhayewani.

⁹ 'Ariri hiki terita kaneyu'awietani yatini muwa xaitsie. Xika miki meri 'aye'ani waretakwini, kemi'ane mipai miretimani mipai pitayini: “'Awitsaruni kuyaximama mekanekwi'iwa”.

¹⁰ Xika mipai reyini kuyaxi waikawa memiy*w*awe memayu'eririya maye 'uki hepai mekanitimamakuni, metsi yunaiti 'ixaheritsixi mekatenimaika 'apaapa Rawiri kuya kwinimieme mireuyutamiewe kanihikitini meta teiterimama memiy*w*awe mekanihikitini.

¹¹ »Neta mipai pita nepitiku'eriwa: 'Eki ti'aitame yunaime 'ixaheritsixi kememiyupaime keniwaruta'ini, Rani kiekatari 'atsita Weritsewa meye'atikaime. Mekaniyumiireni xiekari haramara tetsita mitika hepai, meta 'eki ti'aitame pekaniwaranuwitimiki memiyukwiyutsie.

¹² Rawiri tekanetamiekuni, tsepa hakewa meyeikani, hetsiena tekanekaxirikuni haitsi

kwiepa mitikaxiriwe hepai. Xewiti 'ayeniereti pikayuhayewa miki meta nixewiti kuyaximama.

¹³ Xika heyuti'awieta kiekaritsie, tanaiti 'ixaheritsixi kaunari mana tekananuhurikuni, teyuniti tinaime mana timieme 'akitsie paiti teteneukaxirikuni, tinaime tetenakumaw-eriyakuni tete xewiti pikayuhayewa mana».

¹⁴ 'Awitsaruni meta 'ixaheritsixi yunaiti mipai mekaniutyuani:

—Hutsahi 'araki tewiyari kemitiku'eriwa 'aixia kani'aneni keyuri 'Akituperi niukieya.

Mipai pitiiyi Yawé yamainekaikiri 'Akituperi kemitiku'eriwakai yamikatyuniki, tsepaneti miki matsi waikawa mitimaiwekai, mipai 'Awitsaruni 'axamuyurieniki.

¹⁵ Hiki Hutsahi mawari wewiwamete Tsaruki meta 'Awiyataxi mipai katiniwarutahiawe:

—'Akituperi 'Awitsaruni 'ipai katiniwaruxatiani meta 'ukirawetsixi 'ixaheritsixi, neta matsi 'ipai pita nepitiwarexatia.

¹⁶ Xeiya mexiima Rawiri 'iki niuki xekenanuni'airi: “Ti'aitame 'iki tikaritsie makumawetsie makuweritsie pepika'ahayewani, matsi 'aixia piyini, yapauka 'anutaiyepai xemanukune, nika xe'ukwi'iwa mana 'eki ti'aitame meta memimatsi'aweiya”.

¹⁷ Kunatani 'Akimatsi matia 'Enixuk-eri mekaniyuhayewakaitini. Miki mepiyukweriwayuriekai xewiti waruxeiyaki kiekaritsie meheutahaxiaximekaku, 'ayumieme xewiti ti'uximayatame 'ukaratsi pihiritiariiekai niuki mutuaneniki wahetsia para mikitari Rawiri memiyetuiriwani.

18 Peru xewiti temaiki kaniwaruxeiya 'Awitsaruni mipai katiniutaxatiani, hiki 'ayumieme miki mekaniyuta'una. Kepauka xeime tewi kie memu'axia Wakurini mirakutewatsie, putsuyata mekaneukahaxiani miki yutakwa meixeiyakaita.

19 Hiki miki tewi 'iyaya putsu kananukanani, hetsienata tiriku kanaxeirieni. Miki hepaita nixewiti 'atsipikaretima.

20 Kepauka muwa memeutahaxia 'Awitsaruni kuyaximama, 'ukaratsi mipai mekatenu-uta'iwawiya:

—¿Hakewari Kunatani meta 'Akimatsi?

'Ukaratsi mipai katiniwaruta'eiya:

—Hapa 'anutaiye mekananukine.

Hiki Kuyaxi mekanayekine mewaruwauximeti, peru memikawarukaxeiki Kerutsareme mekanakunuaxiani.

21 Kepauka kuyaxi memeki, Kunatani meta 'Akimatsi putsuta meniwatikine mekanekine Rawiri manuyeikakaitsie meteheitaxatianike. Mipai mekateneitahiawe:

—Hatuxametsie xekananukini mexiima, 'Akituperi mipai kanetayini kename xeke'utakwi'iwa.

22 'Ayumieme Rawiri meta kemi'ane memeweiyaikai mekanekine meta Kurutani hatuxameyaritsie mekananukine kaka-hekiariwekaku 'akuxi. Yunaiti mekananukine keyupaimeti memuhukai.

23 'Akituperi matsi 'Awitsaruni mikahenu'eniki kemitiuxataakai, puxu 'ukuha'aritiaka yukiekar-itsie kaneyani. Kepauka yukie munua, 'aixia tiuyurieka yutiriyama wahetsiemieme, heyaka

xaitsie kaneyukawieni. Mipai katiniumini, kaniukateukieni yupaapa teikipa.

²⁴ Rawiri Makanahini hepa kaneyani, meta 'Awitsaruni kanenukuweiya, Kurutanitsie kananuyani 'ixaheritsixi yunaima warawititi.

²⁵ 'Awitsaruni Kuhawi hetsiemieme xeime kuyaxi tiwa'aitiwame putahiawekai 'Amatsaha titewakame, xewiti tewi 'Itira titewakame munu'ayatikai, miki 'Itsimaheri xiiyarieya pihikitikai miki 'Awikahiri putiwitikai, Nakaxi niweya Tsariwiya 'iwaya Kuhawi warutsieya.

²⁶ 'Ixaheritsixi 'Awitsaruni hamatia memuhukai Karaha kwieyaritsie mekanitiyaxe.

²⁷ Rawiri kepauka Makanahini munua, mana mepititekai Tsuwi Nakaxi nu'aya Xawaha kiekame, miki kiekari 'amunitsixi puwakiekari, Makixi 'Amiheri nu'aya Ru-Rewaxi kiekame, meta Waxitsirahi Karaha kiekame Xukerini kiekariyaritsie.

²⁸ Miki matsi 'uta mepetikai, tekixite meta xarite, metatsiere tiriku, tsewara, harina, xaki, 'imuari 'etsimipepe, mume 'etsimipepe,

²⁹ xiete, kunere, kexiu meta muxatsi wakexiyari. Rawiri 'iki 'ikwaite mekateniyetuirieni meta teiterimama para memitetikwaniki, mipai meteku'eriwati xiari 'iki teiteri mepehaakakwi meta mepeharikwi makumawetsie me'u'uwati, meta mepu'u'uxe.

18

'Awitsaruni kemitiumi

¹ Hiki Rawiri yukuyaxima kaniwaruti'iniata meta 'aixia katiniwaru'uitiani, kaniwarutihawe

xeimiriýari kuyaxi tewa'aitiwamete meta xeit-sienituyari tewa'aitiwamete.

² Yunaimé me'ayehaikame kaniwarayeitiani, mexiakate Kuhawi kaniwarawitikikaitini, hutarieka miemete 'Awitsahi kaniwarawitikikaitini Tsariwiya nu'ya, Kuhawi 'iwaya meta hairieka miemete 'Itahi Kahati kiekame kaniwarawitikikaitini. Hiki kaniwareni'ani memiyukwiyuki. Ti'aitame mipai kaniutayini:

—Neta xehamatia nekanimieni.

³ Kuyaximama peru mipai mekatenita'eiya:

—Tixai, 'eki ti'aitame pikaheuyewetse pemitatsi'anuweiyaki. Tame xika teheyuta'una, mitatsi'aye'unie pikatatsihanuku'erieni. Xikata tame hixiata te'ati tehekwi'iwa, yaxeikia tixaiti pikarayani. Peritsi 'eki ti'aitame kuyaxi tamamata miriyari pekatinaye'aka. 'Ayumieme matsi 'aixia kaniyimiki pemikunuaniki, pemitatsiparewiekaki kiekaritsiepai pe'ukai.

⁴ Ti'aitame mipai kaniutayini:

—'Aixia kani'aneni, xehapaitsita kehepai 'aixia mi'ane mipai ne nekatini kayeimiki.

Mipai 'utayika, kiekari kitenie 'aurie kaniutikeni, mexi kuyaximama me'anuyekikakai xeit-sienituyaritsixi meta xeimiriýaritsixi.

⁵ Metatsiere, ti'aitame mipai katiniwarutahiawe Kuhawi, 'Awitsahi meta 'Itahi:

—Nekanixehiritiaka temaiki 'Awitsaruni xemikaheinanaimakaki.

Yunaiti kuyaxi mekanu'enanani, ti'aitame kuyaxi tewa'aitiwamete kemitiwaruhiritia 'Awitsaruni hepaitsita.

6 Hiki kuyaxi mekanekine 'ixaheritsixi mewaretakwinike, mekaniuyukaxeiya 'Epirahini kwieyaritsie makuxiuyatsie mekaniuyutakwini.

7 Miki tukaritsie kwinimieme katiniuyutikwiti: 'ana xetewiyari miriyari kuyaxi mepukwi'iwaxi. Matsi, Rawiri kuyaximama 'Awitsaruni kuyaximama mekaniwara'iwa.

8 Meyukwitiweti miki kwieyaritsie mekaneuyutaweiyaxiani naitsarie, 'ayumieme miki makuxiuyatsie yeuta matsi yuwaikawati mekaniukwini yukimana, keyuri 'ixiparaki memukwi'iwaxi.

9 'Awitsaruni, 'uyu'unarimeti muratsie Rawiri kuyaximama kaniwaranukunake. Hiki mura xiu 'atimariweme hetia kaneuyehani, muwa 'Awitsaruni mu'uya kiyexitsie kaniutseni. Mura munautsarimekaiki 'Awitsaruni wapaiti kaniuyewiere kiyexitsie.

10 Kuya xewiti munierixi kemiyi, Kuhawi mipai katiniutahiawe:

—'Awitsaruni nekanexeiya xiu kiyexiyaritsie heuyewiekame.

11 Kuhawi mipai kaniutayini:

—Kaukari pemeixei ketitayari mana pekareimi, tamamata pirata tuminiyari nekamani'iitianikekaitini meta hiyyame xeime.

12 Peru kuya mipai katinita'eiya:

—Tsepaneti xeimiriyari tumini pirata nemanu'ii, xiari yaxeikia nenepikanewairiya para ti'aitame nu'aya nemumieniki, tanaiti tepe'enana kepauka xemehiritiarie 'eki, 'Awitsahi meta 'Itahi ti'aitame nu'aya temaiki 'Awitsaruni xemikahenanaimakaki.

13 Xika ne neheimienike neyutatuati, nekanahekiarekekaitini, ti'aitame hixie matsi xewiti miyuta'una pikayiwe, 'ekita yaxeikia pepikanetsiparewienikekai.

14 Kuhawi mipai kaniutayini:

—Yaki xeikia 'ahamatia kwiniemieme nepireutewi.

Hiki yapauka, haikame pitsika 'uti'ika kaneyani 'Awitsaruni tawieyatsie kanei'uitiani, mana mitaxeitsie 'akuxi kanayenierekaitini xiu kiyexiyaritsie 'uyewieti.

15 Meta, tamamata meyupaimeti Kuhawi hiwemete, 'Awitsaruni 'aurie meha'utikineka hutariekake mekanimieni.

16 Hiki Kuhawi katiniuta'aita kuxineta mitahitsierieniki memitehayewaki kuyaxi memiyukwitiwe, 'ana mekatenuhayewa 'ixaheritsixi mewaruweiyati.

17 Kwitiwata 'Awitsaruni kaxarieya me'utikweka, hewatixawakaku mekaneikahiani makuxiuyatsie tetexiki mekanenukanani. 'Ixaheritsixi meta mekaneuyuta'unaxiani yukie.

18 'Awitsaruni mayeyurikaitsie 'akuxi, tete kaniuta'aita 'amitakerieniki, mayeweritsie Ti'aitame mirayetewatsie, mipai tiku'eriwati: «Nixeimetima neniwe nepikahexeiya hetsiena mieme nemaxaxatsiwaniki». 'Ayumieme miki tete 'amitake yuhepai katiniteriwa, 'ayumieme hiki 'akuxi mipai katinimatiwani «'Awitsaruni 'iniarieya tete 'amitake».

Rawiri kemitiuyukahiweri

19 'Akimatsi Tsaruki nu'aya mipai Kuhawi katinutahiawe:

—Keneneupitia ne'unautsarimeti nemiyemieki
ti'aitame nemiretaxatiani kename Yawé 'itawik-
weitsitia memeye'unie wahepaitsita.

²⁰ Kuhawi mipai katinita'eiya:

—Hawaiki hiki 'eki 'iki pepikatiixatiamie.
Hawaikikeri pekatineixatiamieni, hiki hawaiki,
kariki ti'aitame nu'aya kaniumini.

²¹ Hiki Kuhawi kuya xeime 'etiupe tewiyari
hepa 'uyaka mipai katinitani'ani:

—'Eki kenemie, ti'aitame ketinetaxatia
kepemitunierixi.

Tsurani tewiyari Kuhawi hixie 'utihiximakeka
'unautsarimeti kaneyani.

²² 'Akimatsi Tsaruki nu'aya tawarita mipai ka-
tinitahiawe:

—Tsepatsi kenemiranuyetia, keneneupitia
nemiyemieki ne'unautsarimeti 'etiupe tewiyari
hamatia.

Kuhawi mipai katinita'eiya:

—Neuxeitsi temaiki, ¿ketitayarikuta petiyeimiki?
Perepitiarienike pepika'a'erieka pemiretaxataki.

²³ 'Akimatsi tawarita mipai kaniutayini:

—Tsepa keneme'itiarie, nepimiekaku.

Kuhawi kanipitiani:

—Kenemiekuta.

'Akimatsi kanayeyani 'unautsarimeti muwerit-
sie, 'etiupe tewiyari hixie kaniyani.

²⁴ Rawiri kiekari kitenie putikatei
miranutakikatsiesie. Hiki mitaniere wapaiti
panutiyakai kitenie heima paiti 'ixumeritsie,
xeime tewi kaniuxeiya mana 'anautsarimeme
yuxaita.

25 Kepauka mĩtaniere ti'aitame mĩpai mĩtiutahiawixi, mĩki mĩpai kaniutayĩni:

—Xika yuxaita heyianeni, xĩari niuki 'aixia 'anuyĩneme kanikutuaneni.

Mexi 'akuxi tewi mana'amiekai 'unautsarĩmeti,
26 mĩtaniere mĩpai katinetĩmani xewitita tewi 'utĩmana kananautsarĩmekaitĩni, 'ayumieme kite-nie tihĩweme mĩpai katiniutahiawe:

—Xewitita tewi yuxaita mana kananautsarĩmeni.

Ti'aitame mĩpaita kaniutayĩni:

—Mikita yaxeixia niuki 'aixia 'anuyĩneme pukutuane xĩari.

27 Mitaniere mĩpaita kaniutayĩni:

—Mexiakame 'Akimatsi Tsaruki nu'aya hepai pĩtiunautsa.

Ti'aitame mĩpai katinita'eiya:

—Miki tewi 'aixia pĩtiuka'iyari, xĩari niuki 'aixia 'anuyĩneme pukutuane.

28 'Akimatsi kaninuani, ti'aitame kaniutahiawe kwiepa 'utihiximakeka, hiki mĩpai katinitahiawe:

—Yawé 'aixia ke'itĩariaka, ti'aitame 'akakaiyari, kariki kataniyetuirieni kemi'ane memĩmatsi'aye'uniekai.

29 Ti'aitame mĩpai katiniuta'iwauni:

—ǂNeniwe 'Awitsaruni 'aixia kwerietĩ reu'erie?

'Akimatsi mĩpai katinita'eiya:

—Kepauka mati'uximayatsiriwame Kuhawi minetsihenĩ'akai, yuwaikawati kwiniemieme mepetayixia, 'atsinepikaretimari ne kemireyi.

30 Ti'aitame mĩpai katinitahiawe:

—Keniwataye'a 'ena paiti keneuweni.

'Akimatsi kaneutayani yateewa kaniutakeni.

³¹ Hiki 'etiupe tewiyari kaninuani, mipai kaniu-tayini:

—Ti'aitame niuki 'aixia 'anuyineme nekamenikutuirieneni. Yawé kamani-utawikweitsitiani yunaime wahetsiemieme memimatsi'aye'uniekai.

³² Hiki ti'aitame mipai katinita'iwawiya:

—¿Neniwe 'Awitsaruni 'aixia kwerieti reu'erie?

'Etiupe tewiyari mipai katinita'eiya:

—Miki temaiki hepai mekete'ukwine yunaiti memimatsi'aye'unie 'eki ti'aitame, meta yunaiti kemi'ane 'axamemimatsiyuriku.

³³ 'Iki tiu'enieka, ti'aitame waikawa kaniuyukahiwerieni, kitenie heima kii makawetsie, kananutiyani mipai tiutsuati: «Xia'ii 'Awitsaruni, neniwe. Neniwe, 'Awitsaruni, neniwe. Ne pita neminiumikaitini 'ahetsiemieme. Xia'ii 'Awitsaruni, neniwe, neniwe».

19

¹ Hiki Kuhawi mekatenekuxatiani kename ti'aitame waikawa yuheiwieriekai 'Awitsaruni hetsiemieme.

² Kepauka kuyaxi yunaiti memite'utamari, kename ti'aitame waikawa yuniwe hetsiemieme heyuheiwieriekai, miki tukaritsie tsepaneti memite'ayu'iwakai heiwerika tukariyari pita mekanayeitiani yunaiti kuyaxi.

³ 'Ayumieme kuyaxi kiekaritsie mekaneu-tahaxiani 'awie, memuyutetewiyani hepai me'aneneti.

⁴ Matsi ti'aitame, yihixie heuyukunati pikatihayewakai karima mipai tiuhiwati: «Xia'ii,

'Awitsaruni, neniwe. Xīa'īi 'Awitsaruni, neniwe, neniwe».

⁵ Hiki Kuhawi kaneyani hakewa ti'aitame muwayekateitsie, mipai katinitahiawe: «Hiki 'eki ti'aitame yunaime te'a'uximayatsiriwamete pepitatsitewiyatsitia temimatsi'utawikweitsitia, meta 'aniwema 'ukitsi 'ukari, meta 'a'itama meta 'atuxexerima.

⁶ 'Eki memimatsi'aye'unie pepiwanaki'erie, petiwaraye'uxieta kemi'ane memimatsinaki'erie. Hiki mipai pekatinimatsiikini 'akuyaxima tewa'aitiwamete pepikawareuyehiwa meta 'akuyaxima. Hiki mipai nekatinetimani 'eki yapekatina'eriwakaitini pita tame teyunaiti temikwi'iwakekaiki, 'Awitsaruni pitata 'atiuyeikanikēyu.

⁷ Neuxei hikimi. Kenanuyeye'a 'akuyaxima keniwaretawairitia. Xika mipai pekatiuyurieni, Yawé hixie yanekanaineni hiki tikariyaritsie nixewiti tīma kuya 'ahetsia pikayuhayewa. 'Ana matsi waikawa peyuhiwerietī penayeimiki ti'aitame, kepemikati'akahiweriwekai meripaiti hiki 'akuxi».

⁸ Hiki mipai tiutahiawarieka, ti'aitame kananukukeni kiekari kitenie kanayerini. Kepauka kuyaximama memite'utamari, yunaiti hixiena mekaniku'uni.

Rawiri Kerutsareme kemirakunua

Hiki 'ixaheritsixi mekaniyuta'unakaitini yux-exuiti yukie,

⁹ meta naitсарie 'Ixaheri kwieyarit-sie mekatenikuxatakaitini kemitiuyi. Mipai meputiyuanekai: «Ti'aitame

pitatsi'utawikweitsitia memitatsi'aye'unie
 wahepaitsita, tahetsie putanua piritsiteutsixi
 metate'aitiakaku. 'Awitsaruni yianekaku, xeime
 kwieyaritsie puyuta'unaxi.

¹⁰ Hikiri 'Awitsaruni, ti'aitame temeyeitiakai,
 mirayukwitinetsie kanemierieni. Ti'aitame
 tepita'inieni makunuaniki, hikiri pumawe xewiti
 mitatsita'imaiya».

¹¹ Hiki 'ayumieme Rawiri ti'aitame mawari
 wewiwamete Tsaruki meta 'Awiyataxi
 niuki mipai katiniwareni'airieni: «Kura
 kwieyaritsie kiekatari 'ukirawetsixi wahamatia
 xeketenetixata, mipai xeketeniwaretahiawi:
 “Ti'aitame katinetimani naitarie 'Ixaheri
 kwieyaritsie kemitikuxaxatsiwa. ¿Titayari xeme
 'atsixekatehaitika nemakunuaniki ne ti'aitame
 neparatsiyuta?

¹² Ne'iwama xeme xekanihikitini, tekanixeinui-
 waritini. Pikaheuyewetse 'amemitehewewini
 mekanetsita'iniewaweti”.

¹³ Meta 'Amatsaha mipai xeketenetahiawi:
 “Eki yemeki ne'iwa pekanihikitini. 'Eki pita
 nekuyaxima tiwa'aitiwame pekanayeimiki
 'aheyemeki, Kuhawi pikatixairi. Kakaiyari
 'axa'aneme kenetsi'upitiani kanetsinenimayati
 xika nekaraye'atiani”».

¹⁴ Mipai ti'aitame tiwarutahiaweku Kura
 kwieyaritsie kiekatari 'aixia mekatenixeiya, hiki
 me'uyinika mekanita'inieni yunaiti munuaniki
 yunaime yukuyaxima warawititi.

¹⁵ 'Ayumieme ti'aitame matsi
 kaniyukuha'aritiani mayeyaniki, Kurutani
 hatuxameyaritsie paiti kaninuani. Merikite

Kura kwieyaritsie kiekatari Kirikari mekanekine ti'aitame memanukunakeki meta hapa memanakinetsie memiwaranatuaniki.

¹⁶ Matsi Wenikamini nuiwarieya Tsimi Kera nu'aya, Wakurini kiekame, kaniyukumexiitiani Kura kwieyaritsie kiekatari wahamatia, ti'aitame Rawiri 'anunakeke.

¹⁷ Hamatiana mekanuhukaitini xeimiriya Wenikamini nuiwarimama metatsiere Tsiwaha, Tsahuri kie miti'aitametikai, tamamata heimana meyu'auxiwime yuniwema warawititi meta xeitewiyari te'i'uximayatsiriwamete. 'Iki meri Kurutani hatuxameyaritsie mekaniu'axiani ti'aitame 'akuxi kanuawekaku mana,

¹⁸ hiki hatixametsie mekananukine ti'aitame meparewienike meta niwemama memiwaranatuaniki Kurutanitsie. Kepauka ti'aitame manayanikekai, Tsimi Kera nu'aya hixiena kaniutihiximakeni,

¹⁹ mipai katinitahiawe:

—Ne nepimatsiwawirie nekutsiyari ti'aitame ne ke'axanemitiuyuri pepikahe'eriwani, ne ti'a'uximayatsiriwame ke'axanemimatsi'uyuri kepauka 'eki ti'aitame Kerutsareme pemayetia. 'Eki ti'aitame nekamaniwawirieka miki pemiratimaiyaniki.

²⁰ Ne mipai nepiretima 'axanepitiuyuri, hiki 'ayumieme, Kutse nuiwarimama yunaiti meka'axiawawekaku 'akuxi, ne meri nekanayeyani nematsi'anunakeke nekutsiyari ti'aitame.

²¹ Peru 'Awitsahi Tsariwiya nu'aya mipai kaniutayini:

—Tsimi, kemí'ane Yawé manayexei hepaitsita 'axakaniutayini, 'ayumieme peuyewetse miki mimierieniki.

²² Rawiri mipai katinita'eiya:

—Tsariwiya niwemama, xeme xepika'anuyehakeni, nepita kenemitiyurieneni. Xeminetsi'aye'unieka hepai xeputiyuane. Hikiri yunaiti 'ixaheritsixi mepinetsihetima kename ne ti'aitame nehiki, 'ayumieme xewiti pikamini.

²³ Hiki ti'aitame Tsimi mipai katiniutahiawe:

—Hawaiki pepikamini.

²⁴ Metatsiere Mepiwutseti Tsahuri teukarieya kanayeyani ti'aitame 'anunakeke. Yu'ikate pikatihauxiwekai meta yu'ixurikite meta yumixiya pika'ataxiwekai kepauka ti'aitame mayetiatsietiti, kepaukakeri 'aixia reu'erieti munua Rawiri.

²⁵ Kepauka Kerutsareme yeyaka munua ti'aitame 'anunakeke, miki mipai katinita'iwawiya:

—Mepiwutseti 'aku, ¿Ketitayari nehamatia pekaretia?

²⁶ Mepiwutseti mipai kaniutayini:

—Neti'aitiwame 'aku, pepitimate ne mati'uximayatsiriwame nepika'uyeiwe, ne mipai nepira'eriwakai puxu xewiti panutixiratianikekai mipai 'ana 'a'utia nemiyemieki. Matsi neti'uximayatsiriwame Tsiwaha kaneniukwamana,

²⁷ meta ti'aitame 'ahixie 'axakanetinikuxatani xeikia kenemika'utayi. Matsi 'eki ti'aitame niuki tuayame Kaka'yari hetsia mieme hepai

pekani'aneni pekaniyíweni yapemítiuyurieni nehetsie kemímatinake.

²⁸ Ne'iwama teyunaiti nepaapa hetsiemiemete peuyewetse temíkwi'iwaki 'ahixie neti'aitiwame. Miyatiti, ti'aitame ne ti'a'uximayatsiriwame 'amexatsie pemíratikwa'a pepínetsi'upitia nemítikwaniki. Tawarita xíari heitserie nepíkahexeíya nematitawawirieniki ti'aitame.

²⁹ Ti'aitame mípai katinitahiawe:

—Waikawari matsi pemínetikuxaxatíwani píkaheuyewetse. Ne 'ari yanekaniutayini 'eki Tsiwaha matia kwie xekeneuyutaxiteki.

³⁰ Mepiwutseti mípai katinita'eíya:

—Miki píyíwe nekwie naime yuhetsiemieme mayeitiani, ne ne'iyari 'aixia pí'ane 'eki neti'aitiwame xíka 'aixia pereu'erieti 'aparatsiyuta penuani.

³¹ Metatsiere Waxitsirahi Karaha kiekame Kurutani hatuxameyaritsie kaninuani. Xukerini mirayetewatsie paiti kaneyeyakaitini, ti'aitame kepauka hatuxametsie manuyanikekai hamatiana memanukíneki memiparewieniki.

³² Waxitsirahi, 'ari kani'ukiratsitíkaitini nauka tewiyari wiyari kanexeiyakaitini, miki ti'aitame katinikupiniriekaitini tita mireuyehiakai kepauka Makanahini kiekariyaritsie mukatei, miki waikawa katinexeiyakaitini.

³³ Ti'aitame mípai katinitahiawe:

—Kenenanuweiya. Kerutsareme nehamatia kenekani, ne ketita pemíreuyehiaka nepímarekupinirieka.

³⁴ Waxitsirahi mípai katinita'eíya:

—Neuxei, ¿kepaimeme wiyari 'akuxi kuta nepuyeikani? Titayari nereumieni 'ahamatia Kerutsareme paiti.

³⁵ Nauka tewiyari wiyari nekanexeiyaniri, wairiyarika nekatinetimamateni tita 'aixia miti'ane meta 'axamiti'ane, meta nepikareu'iniatari neteta tita nemitikwa'a meta tita nemiti'ie, meta nepikawa'enieri kwikamete 'ukitsi 'ukari. Pikaheuyewetse xiari nemimatsihe'uximatiaka.

³⁶ ¿Ketitayari kuta ti'aitame mipai pener-akapitianikeyu? Matsi hapa xeikia neka-mananuteitamiki Kurutani hatuxameyaritsie.

³⁷ Keneneupitia ne'iwama wahetsia nemakunuaniki, mana nememini meta nepaapama wateukiyapa nemekateukieniki. 'Ena nepimatsihiwirieni Kimani, miki 'eki ti'aitame mimareta'uximayatsirieniki meta 'ahamatia manuyaniki hapa. Nehetsiemieme kepemireyurienikekai, miki hetsiemieme mipai ketineyuri.

³⁸ Ti'aitame mipai katinita'eiya:

—'Aixia kani'aneni, Kimani nehamatia kaniyemieni, kepemaine hetsiena mieme mipai nekatinekayeimiki. 'Ekita tita tsepa pemireuyehiwa nekamatiniiyetuiriemiki.

³⁹ Hiki teiteri meta ti'aitame Kurutani hatuxameyaritsie mekananukine. Meta ti'aitame Waxitsirahi kaniu'itseni metatsiere Kakaiyari kani-utawawirieni 'aixia miyurieniki, hiki Waxitsirahi yukie kanakunuani.

⁴⁰ Ti'aitame Kimani 'eweiyakaku meta kuyaxi Kura kwieyaritsie kiekatari metatsiere kuyaxi

'Ixaheri kwieyaritsie kiekatari hixiapa me'ati me'eweiyakaku Kirikari kaneutiyune.

⁴¹ 'Ayumieme hipati 'ixaheritsixi ti'aitame hetsia mekaniye'axiani mipai mekatenitahiawe:

—ζTitayari ta'iwama Kura kwieyaritsie kiekatari, ti'aitame yeme yuhetsia mieme metehayeitia Kurutanitsie 'anayaku, titayari miki xeikia mete'iwitixime meta tiiriyamama metatsiere kuyaximama yunaime?

⁴² Kura kwieyaritsie kiekatari mipai mekaniu-tiyuani:

—ζTitayari kuta xeteha'a? Ti'aitame 'ahurawa ta'iwa mihikiki. Ti'aitame 'ikwai mitatsiminiki tepikayia meta 'imikieri mitatsiyetuirieniki.

⁴³ Matsi 'ixaheritsixi tawarita mipai mekaniu-tiyuani:

—ζKetitayari kuta waikawa xetatsixani'erieti xeteyia? Tame matsi tamamata mexia heitserie tepexeia Rawiri ti'aitame hetsiemieme keyuri xeme. Meta, tame meri tete'ita'ini munuaniki.

Hiki matsi Kura kwieyaritsie kiekatarita waikawa meha'ati mekaniwaruta'eia.

20

Tsawa Rawiri kemituyehekaxi

¹ Merikitsi xewiti mana puyeikakai 'axatiuka'iyariti Tsawa titewati Wikiri nu'aya, Wenikamini nuiwarieya hetsiemieme. Kuxineta kaniutahitsieni meta mipai katiniuhiwa:

«'Ixaheritsixi, takie teyunaiti tepitayeixiani,

Rawiri hetsia tixaiti tepikatehayexeia,

meta 'etsiwatima mitatietuirieniki 'Itsahi nu'aya».

² Hiki 'ayumieme 'ixaheritsixi yunaiti Rawiri mekaniuku'eirieni, Tsawa Wikiri nu'aya pita mekananukuweiya. Matsi, Kura kwieyaritsie kiekatari ti'aitame mepika'uku'eiri, hamatiana mekanekine Kurutani meyekineka Kerutsareme paiti mekaniye'axiani.

³ Kepauka ti'aitame Rawiri yuparatsiyuta munua Kerutsareme, yutuxexerima kaniwarayeni'ani tamamata memiyupaimakai yuparatsiyu muwaruhiritiakai, xaitsie pitari me'iwiyariekame kaniwarayeitiani. 'Akuxi pitiwamikwakai, peru tawariri wahamatia pika'ukahui. Kiita mepeunakai yuheyemeki, wiuraxi wahapai mepi'aneikai, mipai me'aneneti mepiyuhayewaxi kepaukake memukwi.

⁴ Hiki ti'aitame 'Amatsaha mipai katiniuta'aitiani: «Kuyaxi Kura kwieyaritsie miemete keniwarukuxeiri meta 'ena pepinuani wahamatia haika tukari 'aye'ayu».

⁵ Kanayeyani 'Amatsaha kuyaxi miwakuxeirieniki, matsi kepauka mutipiniyarie pikaraye'atia.

⁶ 'Ayumieme Rawiri 'Awitsahi mipai katiniutahiawe: «Hikita Tsawa Wikiri nu'aya waikawa matsi 'axakataniyuriemiki keyuri 'Awitsaruni. 'Ayumieme kuyaxi 'aixia memi'anene keniwaruta'inieka kenanukuweiya, nika xeime kiekari 'aixia mi'anetsie heyuti'awieta, tatsi'utawikweiya».

⁷ Hiki Kuhawi kuyaximama, kereteutsixi meyiniti meta pereteutsixi meta kuyaxi yemeki waikawa memiyiwawe, 'Awitsahi warawitikikaku Kerutsareme mekanayekine Tsawa Wikiri nu'aya

memanukuweiyaki.

⁸ Kawahuni mirakutewatsie me'u'axiaku tete 'aminena manukatsie, 'Amatsaha kaniwaranukunake. Kuhawi kuya kamixayari kananakatikikaitini hiyameki 'anayihati meta yuteuritsie nawaxa 'amipa pakakekai. Peru 'umiekaku, nawaxaya kanewatiweni.

⁹ Kuhawi yutserieki 'Amatsaha mixiyayatsie kanikawiere 'i'itsenike, mipai tiku'iwawiyati: «¿Ne'iwa, keperaka'iyuniwa?»

¹⁰ 'Amatsaha Kuhawi 'atsipikaretixei tapaki nawaxa 'amipa makwekai, hiki Kuhawi huriepana kaneitseni, 'Amatsaha kwinuriteya kwiepa kaniukawiwieni. 'Amatsaha xeimieme 'utsekieka kaniumini, hiki 'anataru Kuhawi meta 'iwaya 'Awitsahi mekanekine Tsawa Wikiri nu'aya memuweiyakaiki.

¹¹ Kuya xewiti Kuhawi hetsia mieme, 'Amatsaha kaxarieya 'aurie 'utakeka, mipai katiniuhiwa: «Kemi'ane Kuhawi hetsie xemitewiya meta Rawiri hetsie, Kuhawi xekenanuweiya».

¹² Hiki 'Amatsaha kaxarieya xuriyaki heu'iwati huye hixiapa kaniukateitini, kuyaxi yunaiti mana memuyekikakai mekaniwa'uwekaitini me'ixeiyakuti. Kepauka miki kuya mipai miretima, 'itsita paiti kaxarieya kanekutuanu meta 'ixurikiki kanenukanani.

¹³ Hiki 'Amatsaha huyeta 'utikweiyaku, kuyaxi yunaiti Kuhawi matia mekanekine, Tsawa Wikiri nu'aya me'anukuweiyake.

¹⁴ Tsawa 'ixaheritsixi wanuiwarima wahetsia naitsarie kanakukexiya, 'Aweri-Wetimaka paiti

kaniye'ani meta mana Wikiri nuiwarimama yunaiti mekanitinini.

¹⁵ Kuhawi kuyaximama 'Aweri-Wetimaká kiekariyaritsie mekaniu'axuani meta menayaxetikine kiekari warie. Hetsiena memitikine mekaniutawewieni kiekari kuraruyaritsie heutiyuneme memika'unaki, kuyaxi kepauka kiekari tetsariyayari meka'unati memitsutia,

¹⁶ hiki 'uka kwiniē timaiwetī miki kiekariyaritsie kiekame mipai katiniuhiwa:

—Xekeneneu'eni. Xekeneneu'eni. Kuhawi mipai xeketenetahiawi 'ena nehetsia kehayani ne hamatiana nemititaxataki.

¹⁷ Hiki Kuhawi mana 'ahurawa kaniutiyani.

'Ukaratsi mipai katinita'iwawiya:

—¿Kuhawi 'eki petihiki?

Kuhawi mipai katinita'eiya:

—Netsi nekanihikiti.

Hiki 'ukaratsi mipai katinitahiawe:

—Keneneu'eni ne ti'uximayatame 'ahetsia mieme kenemimatitaxatani.

Kuhawi mipai katinita'eiya:

—Nepimatsi'enieni.

¹⁸ 'Uka mipai kaniutayini:

—Meripaiti, kepauka 'uximatiarika muxuawekai, teiteri 'aixia mepitekuyuruwakai 'ena, 'ayumieme 'iki niuki mipai maniyine 'apuyeika: “Xekenehu 'aixia xeketeneyuri 'Aweri kiekariyaritsie”.

¹⁹ 'Iki kiekaritsie kiekatari matsi kayuwati 'amepu'uwa meta yamepitekahu, 'Ixaheri kwieyaritsie matsi tame waikawameki

tepeuyewetse. ¿Ketitayari xeme xete'ika'unaku Yawé tipiinieya?

²⁰ Kuhawi mipai kaniutayini:

—Hawaiki. Kakaïyari kenetsiparewieka mipai nemikatiyurieniki, nemika'ika'unaki.

²¹ Ne mipai 'ayumieme nepikanua, nematsi pita tewi xeime newiyake nepunua Tsawa titewakame Wikiri nu'aya. Miki 'Epirahini hiriyaritsie pikiekame meta Rawiri ti'aitame 'aye'unieti payuyeitia. Xika miki tewi xenetsiyetuirieni, tame tekaniyehuni.

'Ukaratsi mipai katinita'eiya:

—Aixia kani'aneni. Tetsariya warie mu'uya tekaneukahakuni.

²² 'Ukaratsi waikawa timaiwetē yunaime mana kiekatari katiniwarutixatiani. Hiki Tsawa Wikiri nu'aya mu'uya mekananutixiteni meta Kuhawi hetsia mekaneikahiani. 'Ana Kuhawi kuxineta kaniutahitsieni, kuyaxi yunaiti yukie mekaneu-tayeixiani. Kuhawi Kerutsareme kanakunuani ti'aitame hetsia.

²³ Kuhawi 'ixaheritsixi kuyaxiyari wa'ukiyari pihikitikai, Wenahiyaxi Kuyara nu'aya kereteutsixi meta pereteutsixi ti'aitame hīwemete wa'ukiyari pihikitikai.

²⁴ 'Arunirani wairiyarika te'uximayatamete pihiritiariekai, meta Kutsapati 'Akiruri nu'aya ti'utiwame pihikitikai,

²⁵ Tsewa kemitiyi ti'utiwame pihikitikai, Tsaruki meta 'Awiyataxi mawari wewiwamete mekanihikitikaitini,

²⁶ 'Ira Yahixi kiekame ti'aitame Rawiri het-siemie mawari wewiwame pihikitikai.

21

Kawahunitari kememite'unitarie

¹ Merikitsi Rawiri ti'aitakaku haaka kani-utaweni haika wiyari. Rawiri Yawé kaniutahiawe miparewieniki, mipai Yawé katinita'eiya: «Tсахuri meta nuiwarimama puwanakekai hipame waxuriya memitayeuriéniki, miki kawahunitari mepiwarukwi, 'ayumieme haka kanixuaweni».

² Kawahunitari 'ixaheritsixi mepikahikitikai, 'amuxeutsixi memuyuhayewaxi wanuiwari pita mepihikitikai. Tiratu 'ixaheritsixi miki wahamatia mekaniuwewiekaitini yunaiti kayuwati memu'uwaniiki, matsi Tсахuri yemeki pika'inakekai yunaime piwakumaweriyakekai. Yuteiterima waparewimiti xeikia 'ixaheritsixi meta Kura kwieyaritsie kiekatari. Hiki Rawiri kawahunitari kaniwarutakwewieni yuhetsia,

³ hiki mipai katiniwaruta'iwwaiya:

—ǂXehetsiemieme kenetiyurieni kexeteha'eriwa? ǂKehepai netiyurieme 'aixia nepitiyurieni xehetsiemieme, xewiti ke'axamixe'uyuri, mipai 'ana xeme xemitawawirieniki Kaka'iyari 'aixia mitatsiyurieniki Yawé temiteiterimama?

⁴ Kawahunitari mipai mekatenita'eiya:

—Tсахuri tuminieya tame tepikaheuyehiwa meta tiriyamama watumini, meta tame heitserie tepikahexeiya xeime 'ixaheri tewiyari temumieni.

'Ayumieme tawarita ti'aitame mipai katiniwaruta'iwwaiya:

—Kamitsi, ǂkexehaitikani kenetiyurieni xehetsiemieme?

⁵ Miki mipai mekatenita'eiya:

—Tsahuri pitatsika'unamikikai, matsi katanakixitianikekaitini meta 'Ixaheri wakwieyaritsie katanayeweiya.

⁶ 'Ayumieme hiki 'atahutame Yawé menayexei Tsahuri nuiwarimama tepimatsiwawirie pemitatsiyetuirieniki, temiwakawitianiki Yawé hixie Tsahuri manukatei Kiweya mirakutewatsie.

Ti'aitame mipai katiniwarutahiawe:

—Nekanixeyetuiriemiki.

⁷ Matsi Rawiri Kunatani hamatia tiratu memuwewiekaiki Yawé hixie, 'ayumieme ti'aitame Mepiwutseti kaniutinenimayata, Kunatani nu'aya meta Tsahuri teukarieya.

⁸ Matsi 'Aximuni meta xeime Mepiwutseti memitiwiyarieniki katiniuta'aita, miki yuhutati Xitsipa niwemama 'Ayaha niweya Tsahuri hamatia miwarayexeyakai, meta Merawi Tsahuri niweya, niwemama yu'auxiwiti 'Ariheri Waxitsirahi nu'aya hamatia miwarayexeyakai Mekura kiekame.

⁹ Rawiri kawahunitsixi kaniwayetuirieni, miki yemuri 'etsimupetsie mekaniwarukawitiani Yawé hixie. Me'atahutati 'axeikia mekaniukwini, tatsutiariekaku tsewara 'itsanariyari.

¹⁰ Hiki Xitsipa 'Ayaha niweya kuxitari 'utihurieka mana nuaka kaniyuka'itiani 'ayeparitsie mana hunike, mana kaniyuhayewa 'itsanaxa mukatsutiarietsietiti meta kepaukake mukawiyexi. Wirikixi tukariki pikawapitiakai meta tikariki yeutari pikawapitiakai wakaxari memikwaka.

¹¹ Kepauka Rawiri mitiutaxatarie Xitsipa 'Ayaha niweya kemitiuyuriekai Tsahuri

tuxerieya,

¹² hiki Rawiri Tsahuri meta nu'aya Kunatani wa'umeteyari kaneki'ini, Kawetsi Karaha paiti metihetei. Pirtsitsixi Wetitsani kiekariyaritsie teiteri wahixie mekaniwarukawitiakaitini, kepauka Tsahuri mema'i waxitsie Kiriwuha yemuriyaritsie, peru Kawetsi kiekatari miki kiekariyaritsie mekaniwarunawani.

¹³ Merikite Rawiri katiniuta'aita wa'umeteyari manu'iyaniki Kerutsareme paiti. Meta yaxaikia 'atahuta 'ukitsi memukawitiariekai.

¹⁴ Mipai katiniukateukieni Tsahuri meta Kunatani wa'umeteyari, Kihitsi teukiyapa Tsahuri mipaapayatikai, Tsera mirakutewatsie Wenikamini kwieyaritsie. Naiti mipai katiniyini ti'aitame yatiu'aitaku, hiki 'anake Kakaiyari miki kwieyaritsie kiekatari kaniwarutinenimayata.

Rawiri hetsia miemete Kuriyati 'iwamama ke-memitarukwi

(2Tsam 21:15-22 - 1Kem 20:4-8)

¹⁵ Merikitsi pirtsitsixi tawarita mekaniku-maixiani memiwatakwiniki 'ixaheritsixi. 'Ayumieme Rawiri kanayeyani yukuyaxima wahamatia memiwatakwiniki. Hiki Rawiri kaniuti'uxe yumieneti,

¹⁶ 'ayumieme xewiti kwinimieme 'utewiti pimiximekai 'Itsiwiwenu titewati, miki 'ixipara hekware kanakwekaitini meta wurunitse pitsikayari haika kiruyari heimana 'etsiwa matsi katinahetekaitini.

¹⁷ Hiki 'Awitsahi Tsariwiya nu'aya kaneyani Rawiri parewienike, hiki pirtsiteu katiniukwinitiani kanimieni. 'Ana Rawiri kuyaximama mipai mekatenitahiawe: «Hatsuakuri

'eki ti'aitame pepika'ayeyaniri tahamatia pemi'amieneniki, xewiti matsi'umieniki meta 'ixaheritsixi takixeme kapa 'utiniki».

¹⁸ 'Ariketa yapaimexia 'anuyeyaku Kuhuwi mirakutewatsie tawarita piriutsiteutsixi mekaniwarutakwini, 'ana tukaritsie Tsiwekahi Kutsa kiekame, Tsapahi kaniumieni kwinimieme mutewikai.

¹⁹ Hairieka tawarita mekaniyutakwini manatsiere Kuhuwi mirakutewatsie kaniutawikweni, mikita 'Erikanani Yare-'Urekinu nu'aya Wereni kiekame, Kuriyati titewakameta kaniumieni Kahati kiekame, miki pitsikaya 'ikari wewiwame kiyeyarieya hepai kanipakaitini.

²⁰ Tawarita Kahati kiekariyatsie mekaniyutakwini. Manata xewiti 'a'utewiti kaniuyeikakaitini, tewi kwinimieme timariweti xeitewiyari heimana nauka yu'itiwamete kanexeiyakaitini, yumamatetsie meta yu'ikatetsie 'ataxewime 'itiwamete kanexeiyatikaitini.

²¹ Miki 'ixaheritsixi kaniwa'iwamikikaitini memitimamaniki, peru Kunatani Tsimaha nu'aya, Rawiri matsikaya kanimieni.

²² Miki yunaukati teiteri 'amemutiti Xapaha Kahati kiekame meminuiwarimamatikai, Rawiri meta kuyaximama mekaniwarukwini.

22

Rawiri niawarieya

(2Tsam 22:1-51 - Nia 18:1-50)

¹ Rawiri 'iki kwikari Yawé hetsiemieme kaniutawewieni kepauka Yawé Tsahuri hepaitita

kayuwatì mipitì meta yunaimè memeye'unie
wahepaitsita kepauka mitawikweitsitì.

² Mipai kaniutayini:

«'Eki Yawé ne'ai pekanihikitini, netsi'awiwietame
pepihiki,

meta netsiwiaweitsitiwame pepihiki,

³ nekakaiyari, tete kanihikitini miwa
nemuyuti'awiwietà.

Nehetsie nunuwame pihiki, tirikariya nehetsie
nunuwame,

nemiwayuti'awiwietà meutitewa pepihiki.

Miki neheima munua kanihikitini meta netsiwi-
weitsitiwame.

'Eki pepinetsi'utawikweitsitì hipatì menet-
simietiwekaku.

⁴ Yawé nekanahaweni, miki 'aixia pi'ane hetsiena
mieme 'aixia maineni,

hiki 'ana meminetsi'aye'unie watsata
nepitawikweitsitarieni.

⁵ »Ne nepimiximekai, hamewari hepai ti'aneti ne-
heima piyeuriwekai,

haa puwayene pinetsihehoutsitì.

⁶ Miiya kaunarieya teikiyata pinetsiheukahanakai,
miiya winiyarieyatsie nepinehia.

⁷ Waikawa ne'uximatarieti Yawé nekaniutahi-
wieni,

nekakaiyari neputahawixi
minetsiparewieniki,

miki yutukita paiti kaneniu'enieni,

nehiwari nakatana paiti kaneye'ani.

⁸ »Hiki kwie kaniutayuanì, kaniuyuanekaitini,

meta muyuawi mutuikatika kani-
watayuaxiani,
mekaniwatayuani Kakaiyari haxiayaki.

⁹ Yutsurita kitsi pakanenetiwakai,
meta yuteta tai mitiyuxixitsitiwa
puwayenenetiwakai,
ti tatikaiti kanitaxiriwekaitini.

¹⁰ »Muyuawi 'anutayepieka, kaniwakayani,
haiwitiri miyiyiwitsie 'aweti.

¹¹ Yuteitametsie 'anutiyerika, muyuawitsie
kanayeyani,
'anayatsie 'ayerika 'ekatsie kaneyani

¹² Yiriyaki meta haiwitiri wiyeri 'ayemanemeki
kaneuyukunani,
'ixuriki kiiyari hepai 'aneme yuheima kani-
utawewieni.

¹³ Hixiena tirikaiyemeki waikawa 'akuxawatikaku
ti tatikaiti kanitakikakaitini.

¹⁴ »Muyuawitsie Yawé tiranarieya kani-
uyu'eniirikire,
yemeki Kakaiyari 'Amutewi niukieya
kanewayuku'eiya.

¹⁵ Kaniwarutamini yu'iriki meta merikariyaki,
kaniwareutaxiriexiani meta kani-
warutaweiya.

¹⁶ Yawé kaniwarutatieni
meta ha'ati muta'iwekaiki,
haramara hetia mieme kwie pahekiaixi,
meta kwie tsutimeyari hekia kaniyuhayewa.

¹⁷ »'Amautitewatsie 'amamá pepakatseraxi,

nemamatsie pepikawierixi meta haramara
'ameukatewatsie pekanenatihana.

- 18 Meminetsi'aye'unie memimamariwawe wat-
sata pinetsi'utawikweitsitia,
'iya meminetsixani'eriekai
meta memitirikawikai kenemikatitirikaiyekai
ne.

- 19 Kepauka nemikayiwekaitsie,
'ana mekanenanukunake menetsimienike,
peru Yawé matsu pinetsi'uparewi.

- 20 Pinetsi'utawikweitsitia.
'Aixia pinetsi'uyuri yutemawieti netsi-
naki'erieti.

- 21 »Yawé pinerakapitia heitseriemeki
yanemitiyurienekaiki,
ne'iwarika pinetiyeturi tixaiti 'ax-
anemikatiuyuriki,

- 22 Yawé 'aitsikateya ne'enieti nemumieki,
ne hatsuaku 'axanepikatiyuriwe,
meta nekakaiyari nepikaku'eiriwetima.

- 23 Ne naime nepa'eriwa kemiti'aita,
ne nepika'iku'eiriwe 'aitsikateya.

- 24 Hixiena ne'uyeikati nepika'ikwamanawe,
meta nepikanewairiyari 'axanemitiyurieniki.

- 25 Yawé pinerakapitia heitseriemeki
yanemitiyurienekaiki,
ne'iwarika pinetiyeturi 'aixia 'anemeki ne-
muyeikakaiki hixiena.

- 26 »'Eki yapekatinikamieni kemi'ane yamitikamie
hetsiemieme,
heitserie yapepituriene heitserie 'aixia
memiteyurie wahetsie,

- 27 yuri pepitiwa'eririe kemi'ane yuri
memimate'eririe,
'eki matsi pepitimate mitiyukananaima het-
siemieme.
- 28 Tixaiti memikatehayuyeitia memitehayu'iwani
pepiwapitia,
kepauka kwi pemiwaxeiya memiyuti'ire
tixaiti pepikatiwarayeitiwa.
- 29 Yawé, 'eki nekixeme pekanihikitini,
Yawé, 'eki neyiriyá hekiariya pepayeitiwa.
- 30 Penetsitirikariyakaku nekaniyiweni
meminetsi'aye'unie nemiwatakwini,
nekakaiyari nehamatia pe'uyeikakaku
kuraru 'amanutitewatsie nekaneukamaki-
weni.
- 31 »Kakaiyari huyeya matsi yemeki 'aixia
kani'aneni,
Yawé niukieya tixaiti pikareuyewetse.
Kakaiyari rahetsie tinunuwame pihiki
kemi'ane hetsiana memuyu'awieta.
- 32 ¿Kamitsi kemi'ane Kakaiyari pihiki? Yawé xeikia
kanihikitini.
¿Kemi'ane 'ai hepai pi'ane? Takakaiyari xeikia
mipai kani'aneni.
- 33 Miki kanihikitini kemi'ane tirikariya
minetsipitia,
meta nehuye miheitseriya,
- 34 miki pinetsipitia maxa hepai
nemiranautsaweniki,
meta hiri 'amutititsie kanenipitiaka
nemikahekawautseniki,
- 35 nemamatetsie kanetini'ikitiaka nemauyu-
tamieweniki,

- meta pepineti'ikitia wurunitse tupiyari
nemikemakaki.
- 36 'Eki pepinetsiheukunarıma penetsiwikweit-
sitiati,
'aixia petiuka'iyarikaku nehetsiemieme 'aixia
'anemeki nepiyeyani.
- 37 Nehuye 'ari 'aixia pepiyuri,
ne'ikate pekaniutitseiriya.
- 38 »Meminetsi'aye'unie nekaniwaranukuweiya
meta nekaniwarukwini,
nepikawarehayewaxi kepaukake yunaime
nemwarekwi.
- 39 Yunaimeri nepuwarekwi. Tawariri
mepika'anuku'uni.
Nehixie mekaniukaxirieni.
- 40 'Eki tirikariya pekaneniupitiani kepauka ne-
muyutamitsie,
meminetsi'aye'unie pekaniwarupitiani
nehetia memikaxirieniki.
- 41 Meminetsi'aye'unie yu'itia memiyehuki pekani-
warupitiani,
mipai 'ayumieme memikanetsinaki'eriekai
nekatiniwara'iwa.
- 42 Parewiya mekaniwaukaitini, peru nixewiti wa-
hetsie pika'utanua.
Yawé mekanihiwiekaitinita, matsi miki
pikawaruta'ei.
- 43 'Etsimepepeme nepiwarayeitia. Kwie tumua-
nariyari hepai mepiteyuxexeyakai.
Haxu huyeta mitika hepai nepiwarutiketsi.
- 44 »Pepinetsi'uparewi teiteri meminetsi'aye'uniekai
wahetsia,

hipame nuiwarite tiwa'aitiwame
 pepinetsi'ayeitia,
 teiteri nemikawamatekai menete'uximayatsirieti
 mepaki.

45 Teewa mepikiekatari, peru ne mariweme
 mepinetsi'ayeitiwa,
 kepauka nemitiwa'aitia yamekatenikahuni.

46 Miki 'ateewa kiekatari menetsixeyiati meka-
 nenimakaxeni,
 meta memamati memuguayu'awietatsie
 mekanawayekikani.

47 Yawé kanayeyurini. Ne'ai hepaitsita 'aixia kera-
 niuwani.
 Kaka'yari netsi wikweitsitiwame 'aixia
 ketikuxaxatsiwani.

48 Miki Kaka'yari pitiwarakapitiwa 'axake-
 meminetsi'uyuri,
 miki teiteri nehetia puwa'atiwa
 nemitiwa'aitiakaki.

49 'Eki neheima pepunua meminetsi'aye'unie wa-
 hepaitsita,
 'eki 'aixia pepinetipitia meminetsi'aye'unie
 wahepaitsita,
 pekaneni wikweitsitiaka teiteri
 meminetsi haukuwaxia wahepaitsita.

50 Yawé, 'ayumieme ne 'aixia nepaine 'ahepaitsita
 nuiwarite watsata,
 meta niawari 'ahetsiemieme neputikwika
 kepemititewaki.

51 »Yawé, ti'aitameki meminetsi'anayexei
 pepinetsi'upitia waikawameki
 nemirayu'iwani,

ne Rawiri pemínetsi'anayexei meta nenui-
warima
keniwaruxeitsitia waikawameki
kepemitíwanaki'erie yuheyemeki».

23

Rawiri 'imatírieka kemítíuxataxi

¹ 'Íki Rawiri 'imatírieka mieme niukieya
kanihíkítini:

«Rawiri 'Ítsahi nu'aya kemítíwarutaxatia
yuteiterima,
wítsi'aníyítíkai me níawari mutiwewi 'íxaher-
ítsixi wahetsiemieme,
tewi, Mímariwe hepáitsitana 'aixia mutayi
meta Kakuwu Kakaíyarieya menayexei.

² »Yawé 'Iyarieya niuki kaneniupitiani,
hetsienamieme nemítaniuniki.

³ 'Íxaherítsixi wakakaíyari mípai kaniutayini,
'Íxaherítsixi wa'ai mípai kanetiniutahíawe:
“Kemi'ane mítíwa'aitia teítteri kemítíheitserie,
kemi'ane Kakaíyari 'ayemakaxeti mítí'aita,

⁴ miki hekiariya ximeri mieme hepai
kani'anemiki,
kahauháiyakaku manatíneika hepai,
wiyeri 'utia manatíneika hekiariwieti
tupiriya kwiepa mítíneniki”.

⁵ »Kakaíyari yuheyemeki nenuiwarima kaneni-
upitiani,
tíratu yuheyemeki nehamatia kaniuwewieni,
naime 'aixia hauti'aneme, mikayíwe
mípatsieni.

Kakaíyari yakatiniyuriemiki nemírayu'íwaniki,

meta yamiraye'aniki naiti tita
nemireuyehiwa.

⁶ Matsi 'axamemiteyurie xuya mewiwiwa hepai
mekani'aneneni,
yumamaki nixewiti pikawakumaiwa.

⁷ Tepia matsikiiyariki kanikuxexeiriwani meta
pitsika kiyeyariki,
hiki mana tai kanitixixitsitiwani».

*Rawiri kuyaximama memeuyutakwiwawe
(2Tsam 23:8-39 - 1Kem 11:10-41)*

⁸ 'Iki Rawiri kuyaximama kwinimieme
memitehayu'iwakai mekanihikitini:

Kutsewi-Watsewati Hakumuni kiekame,
miki matsi panuyekatei memuyuhaika
wahetsiemieme, heiwamieme meheyukukwika
yupitsikaki 'atahaika tsienituyari teiteri
kaniwarekwini.

⁹ 'Utimana mieme 'Eriyatsaxi Ruruhu
'Akuki nuiwarieya nu'aya pihikitikai,
mikita xewiti memiyuhaika pihikitikai
kwinimieme mireyutamiewe. Rawiri
hamatia kaniuyeikakaitini kepauka yuhutati
memiwaruyehaxiatia piritsiteutsixi Patsiramini
mirakutewatsie meyuxeiriekaku mewatak-
winike. 'Ana 'ixaheritsixi mekaneutayeixiani,

¹⁰ matsi 'Eriyatsaxi pika'utima, hiki
yumiireme piritsiteutsixi kaniwarukwini,
'uxiyaki mamayatsie 'ixiparaya kaniuwere.
Miki tukariyaritsie Yawé kaniwaruparewieni
memitehayu'iwaki. Kuyaxi 'Eriyatsaxi
manuyeika mekanu'axiani, matsi piritsiteutsixi
wapiinite xeikia mete'anupinike.

¹¹ Hairieka mieme kwinimie mireuyutamiewe Tsamaha kanihikítikaitini 'Akehe 'Arari kiekame nu'aya. Heiwa kuyaxi piritsiteutsixi mume 'etsimipepe maku'etsietsie mekaniuyukuxeirieni. Hiki kuyaxi 'ixaheritsixi miki wahixie mekaniuyuta'una,

¹² matsi Tsamaha pikayuta'unaxi, pukunua 'ixaheritsixi wahetsie putanua, 'ana piritsiteutsixi kaniwara'iwa. 'Anata Yawé memitehayu'iwaki kaniwarupitiani.

¹³ Yapaimexia 'anukayakuta, xeitewiyari heimana tamamata watsata yuhaikati kwinimieme memitetirikawi 'Arurani teriyarita mekanekine, Rawiri mayu'awietatsie. 'Itsanari kanitsutarieximekaitini, matsita kuyaxi piritsiteutsixi Xepahini kwieyaritsie mayeweritsie mekaniyuxeirikaitini.

¹⁴ Matsi Rawiri piyu'awietakai 'aitsata, 'ana mitiyehanetsie kuyaxi piritsiteutsixi Wereni kwieyaritsie mekatenitahikaitini.

¹⁵ Rawiri waikawa hauharimiti mipai kaniutayini: «Xikati tiyiwenike xewiti mineniuharitiani Wereni kitenie haa mitiniere».

¹⁶ Hiki memuyuhaika memaayutakwiwawe piritsiteutsixi mematiteitsie mekanitahaxiani, Wereni putsu mitiniereta haa mewatihanaka Rawiri mekanehanirieni. Peru miki pikahenuhari, matsi Yawé yetuirieti pita kanitayeurieni.

¹⁷ Mipai kaniutayini yemeki mariwemeki: «Yawé keneparewieka nemikahenuhareniki. Miki teiteri waxuriya nemanuhareni hepai nekaniyumiki yutukari memiyetua». Pikayuwariri

menuhareniki.

Miki yuhaikati memauyutakwiwawe mariweme-
meki mekateniuyurieni.

¹⁸ 'Awitsahi, Kuhawi pi'iwaya Tsariwiya nu'aya,
miki yuhaikame kaniwani'akaitini, miki matsi
'aixia katinikuxaxatsiwakaitini. Heiwa pitsika
xeikia 'akweti kaniuyutamieni, kaniwarukwini
haika tsienituyari kuyaxi.

¹⁹ Miki matsi waikawa 'aixia tikuxaxatsiwati
kanayani keyuri memiyuhaika, miki
tiwa'aitiwame kanayeitiarieni, peru miki
wahamatia pika'iniarikai.

²⁰ Wenahiyaxi Kuyara nu'aya Kawitseri
kiekame, miki yumemiwame pihikitikai, waikawa
mariweme katiniuyurieni kuyaki. Yuhutame
teiteri memauyutakwiwawekai Muhawi
kiekatari kaniwara'iwa, xeimiemeta kepauka 'iwi
'ukawiwieku putsu muyewakita kaneukahani
maye muwa kaniumieni.

²¹ Yaxeikiata 'Ekipitu kiekame kwinimieme
'utewime kana'iwa. 'Ekipitutanaka tepia
kanakwekaitini, matsi Wenahiyaxi kiye xeikia
kanakwekaitini, hiki tepia 'inawairieka mikiki
kanimieni.

²² Wenahiyaxi Kuyara nu'aya waikamexia
mipai katiniyumienekaitini rayu'iwati, mikita
yaxeikia 'aixia pitikuxaxatsiwakai memiyuhaika
memauyutakwiwawe wahepai,

²³ matsi miki wahamatia pika'iniatsiekai,
tsepaneti waikawa mitiuyuri xetewiyari
heimana tamamata memauyutakwiwawe
wahamatia. Meta matsi Rawiri 'ihiwemete
tiwa'aitiwame kanayeitiani.

- 24 Xeitewiyari heimana tamamata memauyu-
takwiwawe wahamatia memaye'ukai 'iki
mekanihikitini:
'Atsaheŕi Kuhawi 'iwaya,
'Erikanani Ruruhu nu'aya Wereni kiekame.
- 25 Tsama Karuri kiekame,
'Erikaha Karuri kiekame,
- 26 Heretsi Pereti kiekame,
'Ira 'Iketsi nu'aya Tekuha kiekame,
- 27 'Awihetsexi 'Anatuti kiekame,
Mewunahi Kutsa kiekame,
- 28 Tsarimuni 'Akuki nuiwarieya,
Marahi netupatanaka,
- 29 Kereri Wanaha nu'aya netupatanaka,
'Itahi Xiwahi nu'aya, Kiriweya kiekame
Wenikamini kwieyaritsie,
- 30 Wenahiyaxi Piratuni kiekame,
Hirahi Kahatsi 'akiyaritsie kiekame,
- 31 'Awi-'Ariwuni Weti-'Arawa kiekame,
'Atsimaweti Warahumi kiekame,
- 32 'Erihawa Tsariwini kiekame,
Yatseni niwemama,
Kunatani
- 33 Tsama nu'aya 'Arari kiekame,
'Ahiyani Tsaraxi nu'aya Harari kiekame,
- 34 'Eripereti 'Akatsiwahi nu'aya Mahaka tewi-
yari,
'Eriyani 'Akituperi nu'aya Kiru kiekame,
- 35 Ketsiru Kaximeri kiekame,
Parahi 'Arawi kiekame,
- 36 'Ikari Natani nu'aya, Tsuwa kiekame,
Wanihi Kahari kiekame,
- 37 Tsereki 'amuni tewiyari,

Nakarahi Weruti kiekame, Kuhawi Tsariwiya
nu'aya hetsie nunuwame patia,

³⁸ 'Ira 'itirita tewiyari,

Karewi 'itirita tewiyari,

³⁹ 'Uriyaxi heti tewiyari.

Yunaiti xeitewiyari heimana tamamata
heimana 'atahuta mekaniyupaimekaitini.

24

Rawiri kuyaxi kemitiwaruti'iniataxi

(2Tsam 24:1-17 - 1Kem 21:1-17)

¹ Merikitsi Yawé 'ixaheritsixi wahetsiemieme
tawarita kaniuyeha'ani, Rawiri mipai
katiniu'eritiani teiteri wahetsiemieme mipai
mitayiniki: «'Ixaheri kwieyaritsie kiekatari
meta Kura kwieyaritsie kiekatari kuyaxi
xekeniwaruti'iniata».

² Hiki Rawiri ti'aitame, Kuhawi kuyaxi
tiwa'aitiwame mipai katiniutahiawe:

—'Ixaheri kwieyaritsie naitserie xekenehu,
Rani mitiyetewatsie xekaneikatsutiakuni
Weritsewa paiti 'uye'atikaime, kuyaxi
xekeniwaraka'utia, ne yanemiretimaniki
keyupaimeti memakine memiyutakwini.

³ Kuhawi mipai katinita'eiya:

—Yawé 'akakaiyari xeitsienituyari paimexia
kewarutimiiriya 'eki 'akuyaxima, meta
kematsi'upitiani pemiwaxeiyaki. Matsi ¿'eki
ti'aitame ketitayarikuta miyapetiutaine?

⁴ Matsi ti'aitame kemainekai yakatiniuyini,
Kuhawi meta kuyaxi tewa'aitiwamete
kememaitikatei yapikatiuyi, hiki mekanayekine
'ixaheritsixi kuyaxiyari mewaraka'utianike.

5 Kurutani hatuxameyaritsie me'ukineka 'Aruhexi mirakutewa hetia mekanikuyaxe mayeweri, mana memiyekita Kahari meta Katsexi kwieyaritetsie mekaniu'axiani.

6 Karaha mekanekine meta Takitini Kuhutsi kwieyaritsie, Rani Kahani meye'axianike meta Tsiruni 'aurie mamanetikatsie.

7 Kiekari Tiru mitirikaiyetsie mekanekine, naitsarie heweutsixi meta kananeutsixi wakiekaritetsie mekaniye'axiani. 'Imatiriekia, Weritsewa makumawetsie Kura kwieyaritsie mekaniye'axiani.

8 'Atanauka metseri heimana xeitewiyari tukari metehauyetereka mekanakunuaxiani Kerutsareme, naitsarie me'akukexiyaka 'Ixaheri kwieyaritsie.

9 Kuhawi kuyaxi keyupaimeme memiwaraka'utiakai ti'aitame kaniyetuirieni: 'Ixaheri kwieyaritsie 'atahaika tsienituyari miriyari kuyaxi mekanekine 'ixiparaki mema uyutakwiwawe meta Kura kwieyaritsie kiekatari 'auxiwime tsienituyari miriyari mekaniyupaimekaitini.

10 Hiki Rawiri 'anake katinetimani ke'axamitiuyuri kuyaxi miwaruti'iniataxiki, hiki Yawé mipai katiniutahiawe: «Waikawa yemeki 'axanepitiuyuri. 'Atsimikatitude hepai nepitiuyuri. Yawé, ne waikawa nepimatsiwawirie, kenetineuyehiwiri kweriet».

11 Hiki kwiximeri paiti, Rawiri ka'anukukewekaku 'akuxi, Yawé niukieya Kakaiyari niukameya Kahari hetsia kaninuani, Rawiri hetsiemieme mitixeiya:

12 «Rawiri hetsia kenemie mipai ketinetahiawi:
 “Yawé mipai kanaineni: ‘Nepimatsipitia
 'iki haikame 'uximatiarikatsie xeime
 pemanayexeyaki, yakenetineutahiawi ke'aneme
 nepimatsipitiani.’ ”»

13 Hiki Kahari Rawiri hetsia nuaka mipai ka-
 tinita'iwawiya:

—¿Kemi'ane pepeuyehiwa: haika
 wiyari haakaxa takwiepa titaweni,
 nutsu memimatsi'aye'unie haika metseri
 mepimatsimietiwani 'ekita pemi'aku'unaneniki,
 nutsu haika tukari kwiniya pitaweni takwiewarit-
 sie? Keneutimaixia meta yakenetineutahiawi
 yanemireitahiaweki minetsiheyeni'a.

14 Rawiri Kahari mipai katiniuta'eiya:

—Yemekí nepitsaipine yanemutayini
 nepikayiwe. Matsi 'aixia pi'ane Yawé
 mitatsi'uximatiani, matsi naki'eriya
 mimariweki, 'aixia pika'ane teiteri xika
 menetsi'u'uximatiani.

15 Yawé, 'ayumieme 'Ixaheri kwieyaritsie
 kwiniya kaneyeni'ani, miki ximeriyaritsie kan-
 itsutiani kemireku'iniarikai mipai katineutere,
 naitsarie kwiepa haika tewiyari heimana
 tamamata miriyari teiteri mekaniukwini Rani
 meta Weritsewa paiti meye'atikaiti.

16 Hiki niuki tuayame Yawé hetsia mieme
 kaniyukuha'aritiani Kerutsareme mika'unaki.
 Peru Yawé 'anatiti piwarutinenimayataxi kwiniya
 hepaitsita muwareni'airiekai. Mipai niuki
 tuayame katiniutahiawe: «'Ariri ketineuhayewa».
 Mipai pitiuyi 'Arahuna kewutseu tewiyari

tiriku matihena 'aurie, hakewa niuki tuayame mewekai.

¹⁷ Hiki Rawiri kepauka niuki tuayame muxei kemitiwakwikai, Yawé nenewieri mipai katiniupitiani: «'Iki teiteri 'axamepikate'uyuri muxatsi wahapai mepi'ane. Ne pita nekanihikitini 'axati'aneme nemireutiwiwiexia meta 'axanemitiuyuri. Nepita 'axamiti'ane nehetsie ketiunake meta netiriyama wahetsie».

*Rawiri mawari taiyame kemitiutawewi
(2Tsam 24:18-25 - 1Kem 21:18-26)*

¹⁸ Hiki 'ana tukariyarsie, Kahari Rawiri hetsia kaneyani meta mipai katineitahiawe: «Kenanutiyaka, mawari taiyame Yawé hetsiemieme keneutawewi, 'Arahuna kewutseu tewiyari kwieyatsie tiriku matihenakai».

¹⁹ Hiki Yawé Kahari mipai tiutahiaweku, Rawiri hetsia kaneyani.

²⁰ Kepauka 'Arahuna miwaruxei ti'aitame meta te'i'uximayatsiriwamete 'ame'atihume, kanayeyani hixiena kaniutihiximakeni.

²¹ 'Arahuna mipai kaniutayini:

—'Eki ti'aitame, ¿ketitaki petinua nehetsia?

Rawiri mipai katinita'eiya:

—'Akwie tiriku pematihenatsie nepimatsikunanairiene, mana mawari taiyame Yawé hetsiemieme nemitawewieniki, kwiniya teiteri wa'uximatiati mitihayewaki.

²² Hiki 'Arahuna ti'aitame mipai katiniuta'eiya:

—Tita mimatinake ketineutimawa. 'Ena mekanixuaweni tuurutsixi mawari memayaniki, kiyexi meta tiriku 'uwame mahete meta yukute.

²³ 'Tki naime 'eki nekamatiniyetuirieka. Yawé 'akakaiyari 'aixia 'anemekí mímatsixeyianiki.

²⁴ Hiki Rawiri 'Arahuna mipai katiniuta'eiya:

—Mipai 'aixia pikayini. Yawé nekakaiyari mawari taiyariyari nemiwewirieka tixaitiki nekareuyuyehiame. Naime nekamatiniti-nanairiemiki kemiraye'atika.

Mipai katiniuyini Rawiri kwie kaniunaneni meta túurutsixi, huta tewiyari heimana tamamata pirata rahetemeki katiniuyutuani.

²⁵ Mana mawari taiyame kaniutawewieni Yawé hetsiemieme, hiki mana mawari taiyariyari kaniuwewieni meta 'aixia memiteyuxeianiki mawariyari. 'Anake Yawé teiteri kaniwarutinenimayata, hiki kwiniya katiniuhayewa 'ixaheritsixi wakwiti.

**KAKAFYARI NIUKIEYA XAPAYARI
WIXARIKAKI**

**The Holy Bible in the in Huichol language of Mexico,
2020 edition**

**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3